

中國全

名勝古蹟大觀

續編




上海

大陸圖書公司印行

上海图书馆藏书



A541 212 0018 9754B



中華名勝古蹟續編目錄

第十一編 浙江

一 錢塘

玉皇山 雲泉山 水樂洞 呼猿洞 于謙墓 三烈士墓 臨平山 臨平湖

西山 東山 占鰲塔 九鐵牛 惠力寺 淨妙寺 覺王寺 西巖山 申屠山

孫鍾墓 天柱山 徑山 天目山 玲瓏山 九仙山 友錦山 玉袖洞 吳

越王墓 石柱山 西菩山 仙坑山 千頃山 幻居庵 古銅如來像 曝書亭

東園 魏忠節祠 石帆山 金粟寺 千瑩墓 道場山 何口山 西塞山

窪橋亭 趙孟頫故里 顧渚山 石壁山 塔山 蔭山 碧隴 六洞橋 天池

廟

二 會稽

一九一四一

中華名勝古蹟 第十一編 目錄

二

大梅山 阿育王山 天封塔 密雲塔 慈湖 姜西溟故里 隱潭 靈巖山
龍洞 靈石 會稽山 法華山 雷門 雲門山 夏禹陵 陸游故里 王守仁
墓 大山 石巖山 覺苑寺 五洩山 鐵厓山 祭忠臺 靈緒山 明塘湖
鳳鳴山 蘭芎山 東山 白馬湖 剡山 金庭湖 三懸潭 沃洲山 天姥山
石城山 括蒼山 玉峴山 龍公嶼 芙蓉洞 二徐墓 三峯山 赤城山
瀑布山 銅壺滴漏 國清寺 真覺寺 高明寺 大佛字 拜經臺 銅殿 合
掌巖 萬年寺 善興寺 萬安院 閩風臺 方孝孺故里

三

金華

四一—四八

洞巖山 紫霞山 方巖山 陳亮讀書處 石鼈潭 劉巖 寶掌山 福民山
王質遇仙處 趙抃宅 龍邱山 白巖 目蓮洞 孤高亭 羨山 金紫峯 瑤
林洞 一指石 方干故里 謝翱墓 靈巖山 大悲巖 慶雲山

四

甌海

四八—五八

赤水山 東山堂 讀書堂 南明山 溪雨亭 石門山 方山 浣紗溪 劉基墓
仙都山 玉蓮山 湖山 靈泉洞 新嶺鳳凰山 琉華山 大際 福全山
鰲山閣 西際山 天冠峯 鐵城嶂 靈靈寺 淨名寺 燕尾瀑 石門潭
聽詩叟巖 老僧巖 龍鼻洞 羅漢洞 石梁洞 龍湫 王十朋墓 南雁蕩山
白雲山

中華名勝古蹟
第十一編
目錄

中華名勝古蹟續編

第十一編 浙江

一 錢塘

玉皇山

玉皇山在杭縣。與鳳凰山相近。巔有玉皇宮。山腰有七星缸。鐵質。外鑄符籙。排列如北斗星狀。以杭垣多回祿。清雍正時。總督李衛從形家之言。特置之以鎮壓火警者也。

雲泉山

雲泉山在杭縣南二十里定山之西楊村。一名壘山。有二洞。上洞曰風水洞。以炎暑時颯颯有風。故名。中多石子。紅點如硃。持出卽隱。置於內如故。

水樂洞

水樂洞在杭縣南高峯西煙嶺霞下。虛圻空曠。泉水清甘。左發右瀉。聲如金石。宋熙寧二年。守鄭獬名曰水樂。今洞口有隸書清響二字。不知何人所鐫。洞旁有寺曰水樂。又名點石庵。中有缸曰萬年。相傳初以尋常之缸嵌於石。歲月深遠。乃與石合。因名。

呼猿洞

呼猿洞在杭縣靈隱山下。廣丈許。高二尺。宋僧智一善嘯。嘗養猿於山間。臨澗長嘯。衆猿畢至。好事者每來施食云。

于謙墓

于謙墓在杭縣西三臺山麓。明成化二年於墓側建祠。曰旌功。每秋月杭人蠲潔於祠中。祈夢最驗。祠有玉陽明聯云。一赤手挽銀河。君自大名垂宇宙。青山埋白骨。我從何處哭英雄。一按謙字廷益。明錢塘人。永樂進士。宣德初授御史。累官兵部左侍郎。瓦剌入寇。英宗北狩。郕王監國。遷兵部尙書。徐瑄

倡議南遷。謙厲聲折之。守議遂定。時中外洶洶。獨倚重謙。景帝遂敕謙提督各營軍馬。五刺兵逼京師。謙身督諸軍力戰却之。論功加少保銜。五刺因遣使議利。卒還上皇。謙之力也。後英宗復位。謙爲石亨輩所誣。論棄市。籍沒。成代初復官。宏治初加太傅。諡忠愍。萬曆中改諡忠肅。清王景彜嘗作詩云。「人將忠肅方忠武。我道明宗似宋宗。留下西湖雙憾事。老僧憤打夕陽鐘。」蓋慨乎言之也。

三烈士墓

三烈士墓在杭縣孤山東。墓毘連起三頂。中爲徐烈士錫麟。兩旁一爲陳烈士伯平。一爲馬烈士子畦。咸有石碑。三烈士皆紹興人。倡革命而死者也。相近有竺烈士紹康墓。及南京陣亡將士墓。

臨平山

臨平山在杭縣東北。臨平鎮。一名梁王山。亦稱邱山。唐嘗置臨平監於山下。

山平曠逶迤。無崇岡修阜。上有龍洞。世傳古時龍見於洞。宋高宗南渡。嘗避難於此。山下有淬石。俗稱錢王磨劍石。

臨平湖

臨平湖在臨平山下。本名東湖。吳赤烏二年。寶鼎現於湖。因名鼎湖。宋謝翱沈文天祥綠端蟬腹硯於鼎湖。卽此。

西山

西山在海寧縣東北六十里。一名硤石山。下有硤石鎮。唐白居易嘗登此。名之曰紫微山。（居易曾官中書舍人。中書省唐嘗改爲紫微省。故名。）有紫微洞。登眺臺。白水泉。百步石。盤陀石諸勝。並有唐章孝標留題上方山詩。暨宋右班殿直監漵浦鎮稅兼煙火局樊世卿書紫微山兩石刻。山有四景。曰紫微春曉。西寺煙鐘。丹井流霞。鶴亭仙洞。

東山

東山在海寧縣東北六十里硤石鎮。東接海鹽縣界。以宋臨海南陽二郡太守沈景葬此。又名沈山。有試箭嶺、觀海峯、唱石岩、冷雲窩、萬石窩、石屋洞、智標塔、顧况讀書臺、天眼泉、眠雲石、眠牛石諸勝。山有六景。曰碧雲夕照、智塔穿霄、書巖疊翠、劍池寒潭、東岳霽雪、北亞晴巒。齊海鹽令周顥嘗登山謂其林境清麗。亞於鍾山。故山北一名北亞山。北亞晴巒卽在於此。舊曾有周顥宅。上說六景與西山四景並南山之桃源著雨、南湖之南湖夜月。號爲硤石十二景。

占鰲塔

占鰲塔在海寧縣大東門外。高十五丈。廣九丈六尺。明萬曆四十年建。登頂遠眺城市歷歷全收眼底。

九鐵牛

九鐵牛在海寧縣。清雍正八年。總督李衛鑄五頭。乾隆六年。巡撫張若震鑄

四頭。

惠力寺

惠力寺在海寧縣硤石鎮。山門外幢石有唐白居易題名。寺內有迴文壁。砌紋如織。歷年久遠而不損壞。相傳爲公輸神迹。

淨妙寺

淨妙寺在海寧縣周王廟地方。寺殿側有北齊武帝永明時海魚肋骨一事。長十餘尺。歷年一千四百數十歲。固亦一古物矣。又有大銀杏二株。乃宋理宗嘉熙時所栽。

覺王寺

覺王寺在海寧縣長安鎮。距滬杭甬鐵道長安站可半里。舊名正覺。有三國吳帝孫權第三女魯育墓。墓輒相傳可作硯。

西巖山

西巖山在富陽縣北三十里。山壁峻峭。瀑布飛流其間。自左而下。地平如掌。風環水繞。奇秀插天。當篠嶺大路之西。岩下有洞。洞口有池。早晚與潮應。有葛洪煉丹鼎。山下有石扣之。鏘然。人號石鼓。

申屠山

申屠山在富陽縣西南五十餘里。高三百丈。峯巒重疊。端若拱揖。湍水怪石。千巧萬狀。中有平田。如設萬席。漢申屠剛。申屠璠皆結廬於此。後其子孫家焉。

孫鍾墓

孫鍾墓在富陽縣陽平山。鍾富春人。性至孝。種瓜爲業。嘗有三少年詣鍾乞瓜。謂鍾曰。此山下作冢。當出天子。君下山百步許。顧見我去。即可葬也。鍾去三十步。便反顧。見三人並成白鶴飛去。鍾志之。及卒。葬焉。墳上嘗有紫雲。蔓延數里。人謂孫氏其興矣。後其孫堅爲吳郡別駕。堅之子權稱吳帝。與蜀魏

成鼎足之業。

天柱山

天柱山在餘杭縣西二十里。與大滌山相峙。道書謂爲五十七福地。四面陡絕。中突一峯。聳翠參天。山後有仙人洞。冬溫而夏涼。中有石鐘石桌石凳之屬。壁間刻有佛像。山之前則青壇山。不甚高而泉石奇秀。其連麓者爲九鎖山。紆迴曲折。舊有洞霄宮。今已毀圮。僅存基石。

徑山

徑山在餘杭縣西北五十里。南去臨安縣三十里。高三千餘丈。周五十里。乃天目山之東北峯。以山徑通天目而名。有東西二徑。盤折而上。各高十里許。七峯羅列。最爲幽勝。其地最高。浙西諸山皆在其下。宋高宗孝宗皆嘗遊於此。七峯者。左曰晏坐。曰朝陽。右曰鵬搏。曰凌霄。曰御愛。北曰天顯。前曰堆珠。而凌霄最高秀。爲山之主峯。又有喝石岩。玉芝岩。冷凡鳴。石壁鳴。千丈坊。積

雪坑明月池。洗硯池。甘露泉。龍鼻泉諸勝。其風嘯嶺則在山南。塔下爲臨安大道。東有直嶺通邑成。

天目山

天目山在臨安縣西北五十里。與於潛縣接界。卽古浮玉山也。有兩峯。峯頂各有一池。左右相對。因名天目。道書爲三十四洞天。名太微元蓋洞天。屬於臨安者。曰東天目。高三十九百丈。有大仙將軍寶珠等峯。洗眼浮玉白龍煉丹等池。瀑布玉劍等泉。有八景。曰仙峯遠眺。雲海奇觀。經臺秋風。平溪夜月。蓮花石座。玉劍飛橋。懸厓瀑布。古殿棲雲。山下有許邁修真處。有古刹曰昭明寺。梁建。歷代重修。至今尙存。相傳梁昭明太子修禪處。清雍正中。世宗題匾曰普昭大千。又有紫陽宮。亦梁時建。本名太清宮。宋宣和間改。相傳張紫陽修煉處。西天目屬於潛。在縣北四十五里。高二千五百丈。有十二龍潭。三十六洞。其峯有翔鳳。天柱。玉柱。香爐。象鼻。巖有獅子。響水。紫微。芝草。石有石

城石門石室石鼓石版等。山南有張道陵隱室。獅子巖右有禪源寺。元建。本名獅子正宗寺。清雍正十年改。

玲瓏山

玲瓏山在臨安縣西七里。兩山屹立。盤屈凡九折。山有蘇軾手筆刻石厓。並有蘇軾黃山谷佛印像碑。左折有石佛三尊。右上有禪院。院旁有泉。泉蓄金魚。

九仙山

九仙山在臨安縣西南十二里。山有綦盤石。相傳有樵夫入山采薪。觀八人綦於石上。久之歸去。抵家已閱八十年矣。於是意八人或卽所謂八仙乎。重入山覓之。至原處。果仍在。遂不復下山。後人因名山曰九仙。宋蘇軾嘗遊此。有宿九仙山詩。詩注云。九仙左元放許邁王謝之流也。

衣錦山

衣錦山在臨安縣南一里。木名石鏡山。山有石鏡。徑有二尺二寸。其光如鏡。鑿物分毫不差。相傳錢鏐少時遊此。顧其形服冕旒如王者狀。其後唐昭宗升衣錦營爲衣錦城。並改石鏡山曰衣錦山。錢鏐遊衣錦城。宴故老。山林皆覆以錦。號其幼所戲大木曰衣錦將軍。

玉仙洞

玉仙洞在臨安縣南四十里。洞深二十餘丈。峻壁擁石高十餘丈。左青右黃。有玉芝寶座及仙人跡二柱。屹立色甚潔白。因名玉山。

吳越王墓

吳越王墓在臨安縣治東北之安國山下。墓高聳如阜。正對功臣山之功臣塔。墓前有石碑暨石人石虎之屬。或云此係僞冢。其真墳實在縣署二門左首之地下。安國山一名太廟山。舊有吳越王太廟。今關岳廟。其故址也。內有石室。傳係唐時遺物。吳越王故里。卽在縣南二里之石鏡鎮。唐昭宗名其鄉。

曰廣義里曰勳貴。

石柱山

石柱山在於潛縣東北五里。爲縣主山。上有石天然成柱。高二丈。闊二丈。有古篆十數字。

西菩山

西菩山在於潛縣西十三里。九嶺交陳。雙峯對峙。中有飛泉三疊。怪石萬狀。其西有煉丹岩。石色赭赤。屹立萬仞。岩下有石室。

仙坑山

仙坑山在新登縣西二十里。產茶。下有蛻龍洞。洞門九重。其深莫測。中有躍龍池。相傳昔人得龍蛻骨於此。相近有濠山。一名嶠山。周七十里。有岩洞泉池之勝。

千頃山

千頃山在昌化縣西北六十里。高一千六百尺。綿互六十里。嶺有龍潭。廣數百畝。中有金銀魚。左有樂利峯。壁立孤峭。其連屬者曰大鵠山。勢凌霄漢。上有龍池。濶三百畝。與千頃皆接安徽寧國縣界。

幻居庵

幻居庵在嘉興縣東門外蒯搭坊內。舊藏有明季八十三人合書華嚴經全部。後缺第四十九卷。曹三才補寫之。

古銅如來像

古銅如來像在嘉興縣城內楞嚴寺中。又有石刻玉皇像。在城內玄妙觀中。皆古代物。

曝書亭

曝書亭在嘉興縣。距滬杭甬鐵道嘉興站北一里半。乃清朱彝尊讀書處。亭側有祠。祠有絹本石刻泥塑三遺像。其墓今在百花莊。按彝尊字錫鬯。清秀

水人。少穎悟。書過目輒成誦。肆力古學。康熙十八年召試博學鴻詞。授檢討。入直內庭。未幾罷歸。彙尊博極羣書。尤長於攷據。爲詩清新瞻麗。與新城王士正齊名。所著有經義考、曝書亭集、日下舊聞、明詩綜。凡數百卷。

東園

東園在嘉善縣。距滬杭甬鐵道嘉善站西南三里。本息園故址。中多花木庭院之勝。遊客綦衆。

魏忠節祠

魏忠節祠在嘉興縣。距滬杭甬鐵道嘉善站西南三里。祠有所遺大書案。上有被逮時所斫刀劍痕。其墓今在雲字圩。按忠節名大中。字孔時。明嘉善人。自爲諸生讀書砥行。從高攀龍受業。家酷貧。意豁如也。登萬曆四十四年進士。官行人。數奉使。秋毫無所擾。天祐初。屢遷吏部科都給事中。居官不以家自隨。二蒼頭給費。入朝則鍵其戶。寂無一人。有外吏以苞苴至。舉發之。自是

無敢及其門者。未幾，楊漣疏劾魏忠賢。大中亦率同官上章極論忠賢不法。遂坐受賄被逮。與楊漣、左光斗同夕爲獄卒所斃。人共冤之。毅宗卽位，贈太常卿，諡忠節。

石帆山

石帆山在海鹽縣西南三十二里，澉浦鎮南三里，屹立海中，如張帆然。山之東爲鷹窠頂山，一名南陽山，絕頂可望日出。

金粟寺

金粟寺在海鹽海西南金粟山下。吳大帝赤烏中，因康僧建。明宋濂有記。清康熙五年重修。寺舊有藏經，其頁內襯紙甚佳，書畫家皆珍之。

干瑩墓

干瑩墓在海鹽縣西南四十里。瑩，干室父也。志怪錄云：吳散騎常侍干室父瑩死，以婢殉葬。經十年而母喪，開墓，其婢伏棺上不死，舁還家。經日而甦，室

嘗著無鬼論。至是撰搜神記焉。此事殊怪誕不可信。錄之。燕供遊歷其地者。以資談助云耳。

道場山

道場山在吳興縣西。舊名雲峯。後建僧舍。因改名。山頂有塔。下有伏虎岩。一掬泉。虎跑泉。瑤席池。其山峯巒秀鬱。水石森爽。殊爲佳絕。

何口山

何口山在吳興縣南。又名何山。昔名金蓋山。晉何楷居此修孺業。後爲吳興太守。改金蓋爲何山。王象之云。山與道場山相接。最爲吳興勝遊。然道場之勝在山巔。何山之勝在山下。故蘇軾詩有道場山頂。何山麓之句。

西塞山

西塞山在吳興縣西南二十五里。有桃花鵝。下有凡常湖。唐張志和遊釣於此。嘗作漁父詞。有一西塞山前白鷺飛。桃花流水鱖魚肥。青箬笠。綠蓑衣。斜

風細雨不須歸」之句。

窪樽亭

窪樽亭舊在吳興縣峴山。山有石樽。可容斗酒。唐李適之爲湖州別駕。嘗飲於此。後顏真卿爲刺史。與門生弟姪來遊。作李相石樽聯句。大歷中建亭其上。

趙孟頫故里

趙孟頫故里在吳興縣甘棠橋南。其別業曰蓮花莊。舊在月河西。四面陂水環繞。中多種蓮。按孟頫字子昂。號松雪道人。湖州人。本宋宗室。舉進士爲潤州錄事參軍。宋亡。降元。累官翰林學士承旨。卒諡文敏。追封魏國公。孟頫博通經史。工詩能文。善書法。褚米又善山水。爲畫家南宗。夫人管氏亦能書畫。

顧渚山

顧渚山在長興縣西北四十七里。山周十二里。有峽曰明月峽。石壁峭立。澗

水中流。茶生其間。稱爲異品。茶譜。陸龜蒙嗜茶。置園於顧渚山下。即此。

石壁山

石壁山在德清縣東北三里。巨石直下如峭壁然。故名。山有靈泉。亦名半月泉。宋蘇軾嘗遊於此。賦詩。手書刻石。

塔山

塔山在武康縣莫干山。實莫干山之主峯也。晉嘗建塔於此。故名。上山之路。殊平坦可行。徑如螺形。其巔可遙望錢塘江。太湖。相近有公園在焉。按莫干山去武康縣北二十七里。相傳吳王鑄劍於此。劍號莫邪干將。因名。

蔭山

蔭山亦在莫干山。有盤磴四百二十八級。因又名百步嶺。大與塔山略等。惟差低耳。山麓有瀑布奔湍而下。入於溪澗。

碧隴

此。碧隴在莫干山揚隴坑之西。亦有瀑布。相近有龍潭。潭水清潔。西人恒浴於

六洞橋

六洞橋在莫干山。橋有六洞。因名。又稱大堰橋。橋上有窗牖。憑之四望。風景清幽。橋前有指月庵。一古刹也。

天池廟

天池廟在莫干山。廟旁有三池。廟前有唐代銀古樹。蝙蝠洞。仙人洞。即與廟相近。

一一 會稽

大梅山

大梅山在鄞縣東南七十里。相傳漢梅子貞隱於此。有石洞。仙井。藥爐。丹竈遺跡。

阿育王山

阿育王山在鄞縣東四十里。晉太康中并州人劉薩訶得阿育王舍利。建塔於此。塔下有寺。曰阿育王寺。又有宸奎閣。藏有宋仁宗御書蘇軾撰碑記。

天封塔

天封塔在鄞縣治東南天封寺。唐建。高十八丈。登塔遠眺全城。一覽無餘。

密雲塔

密雲塔乃密雲祖師瘞骨處。在鄞縣天童山天童寺相近之南山。另有禪院陳列祖師所遺之錫杖、雲履等。其履之長度達一尺以上。

慈湖

慈湖在慈谿縣東北十里。唐開元間縣令房瑄鑿以溉田。廣一百五十畝。因縣名慈。又以吳太子太傅闕澤德潤舊居。故一名闕湖。亦曰德潤湖。舊有慈湖書院。建於上。倚山面水。景色清佳。

姜西溟故里

姜西溟故里在慈谿縣治南福聚橋東。西溟名宸英。一字湛園。清慈谿人。少工詩古文。精書法。爲諸生時。已名澈九重。聖祖嘗謂侍者曰。江南三布衣。尙未仕耶。三布衣者。秀水朱錫鬯。無錫嚴繩孫。及先生也。先生性高介。爲當道所梗。偃蹇不得志。康熙丁丑成進士。授編修。年已七十矣。其文雅健。有宋人意。詩宗浣花。而參以玉局。以盡其變。書法鍾王。精妙入神。著有江防海防總論詩文等集。

隱潭

隱潭在奉化縣西北六十里。潭有三。兩厓相抗。壁立數百仞。瀑下如雷。上有巨岩隆起。半覆潭上。旁有石筍。高聳天空。號石筆峯。

靈岩山

靈岩山在象山縣西南四十五里。岩石奇怪。極具天巧。有瀑布倒流百餘丈。

龍洞

龍洞在象山縣東南二十五里。洞中有石室。廣可數丈。天將雨。水如雷鳴。聲聞十數里。

靈石

靈石在定海縣普陀山靈石禪院。登石遙瞻。前山風景。盡收眼底。相近又有大士說法石。五十三參石。點頭石。皆突兀玲瓏。形態詭怪。

會稽山

會稽山在紹興縣東南。水經注。會稽山古防山也。又曰棟山。越絕書。棟猶鎮也。隋書。開皇十四年。詔以會稽山爲南鎮。史記。秦始皇三十七年。出遊上會稽。祭大禹。望于南海。而立石刻。頌秦德。其文曰。一皇帝休烈。平一字內。德惠修長。三十有七年。親巡天下。周覽遠方。遂登會稽。宣省習俗。黔首齊莊。羣臣誦功。本原事跡。追首高明。秦聖臨國。始定刑名。顯陳舊章。初平法式。審別職

任以立恆常。六王專倍。貪戾傲猛。率衆自彊。暴虐恣行。負力而驕。數動甲兵。陰通間使。以事合從。行爲辟方。內飾詐謀。外來侵邊。遂啟禍殃。義威誅之。殄熄暴悖。亂賊滅亡。聖德廣密。六合之中。澤被無疆。皇帝并宇。兼聽萬事。遠近畢清。運理羣物。考驗事實。各載其名。貴賤並通。善否陳前。靡有隱情。飾省宣義。有子而嫁。倍死不貞。防隔內外。禁止淫泆。男女絜誠。夫爲寄猥。殺之無罪。男秉義程。妻爲逃嫁。子不得母。咸化廉清。大治濯俗。天下承風。蒙被休經。皆遵度軌。和安敦勉。莫不順令。黔首修潔。人樂同則。嘉保太平。後敬奉法。常治無極。輿舟不傾。從臣誦烈。請刻此石。光垂休銘。其石刻舊在刻石山。卽鵝鼻山。晉王彪之嘗登刻石山。有詩曰。一隆山嵯峨。崇巒若嶢。傍觀滄洲。仰拂元霄。文命遠會。風淳道遼。秦皇遐巡。邁茲英豪。宅靈基阿。銘跡峻嶠。青陽曜景。時和氣淳。修嶺增鮮。長松挺新。飛鴻振羽。騰龍躍鱗。」

法華山

法華山在紹興縣西南二十五里。十峯聳峙。下有雙澗。唐李紳詩：「十峯挂碧落。雙澗縈清漣。」即謂此。

雷門

雷門卽紹興縣之五雲門。會稽記：雷門上有大鼓。圍二丈八尺。聲聞洛陽。孫恩之亂。爲軍人破。有雙白鶴飛出。後不鳴。漢書所謂毋持布鼓遇雷門。卽此。

雲門山

雲門山在紹興縣南。亦名東山。晉王獻之嘗居之。義熙三年。有五色祥雲見。安帝詔建寺。號雲門。明天啟中重建。相傳昔智永僧居寺。臨書凡三十年。所退筆頭五大瓮。葬之。號退筆冢。人來乞書如市。戶限爲之穿。用鐵裹之。時人謂之鐵門限。宋陸游常作雲門寺記。言寺之沿革。山之泉石。綦詳。茲特錄之於下。不特可資考鏡。抑亦可知今昔之盛衰。與山永之勝概。文曰：「雲門寺自晉唐以來名天下。父老言昔盛時。繚山並溪。樓塔重複。依岩跨壑。金碧飛

踴居之者忘老。寓之者忘歸。遊觀者累日乃徧。往往迷不得出。雖寺中人或旬日不想覲也。入寺稍西。石壁峰爲看經院。又西爲藥師院。又西繚而北爲上方。已而少衰。于是看經別爲寺。曰顯聖。藥師別爲寺。曰雍熙。最後上方亦別曰壽聖。而古雲門寺。更曰淳化。一山凡四寺。壽聖最小。不得與三寺班。然山尤勝絕。遊山者自淳化歷顯聖。雍熙。酌鍊丹泉。闌筆倉。追想葛稚川王子敬之遺風。行聽灘聲。而坐蔭木影。徘徊好泉亭上。山水之樂。饜飫極矣。而亭之旁。始得支徑。逶迤如線。修竹老木。怪藤醜石。交覆而角立。破崖絕澗。奔泉迅流。喊呀而噴薄。方暑凜然以寒。正晝仰視。不見日景。如此行百餘步。始至壽聖。嶄然孤絕。老僧四五人。引水種蔬。見客不知拱揖。客無所主而去。僧亦竟不知辭謝。好奇者。或更以此喜之。今年予來南。而四五人者。相與送予。至新谿。且曰。吾寺舊無記。願得君之文。磨刻崖石。予異其朴野。而能知此也。遂與爲記。

夏禹陵

夏禹陵在紹興縣會稽山。越絕書禹巡狩大越。死葬會稽。葦榔桐棺。穿壙七尺。壇高三尺。土階三等。延袤一畝。宋太祖乾德四年。詔吳越立禹廟于會稽。置守陵五戶。明太祖洪武九年。禁人樵採。設陵戶二人。清康熙二十八年。聖祖南巡。親詣祭告。御書地平天成四大字。勒石陵前。

陸游故里

陸游故里在紹興縣西九里三山。地名西邨。其墓在盧家畧。游字務觀。宋山陰人。佃之孫。年十二能詩。文廕補登仕郎。試禮部置前列。爲秦檜所嫉。檜死。始以薦除敕令所刪定官。孝宗初。遷編修官。召見。賜進士出身。以忤和議。出爲通判。范成大帥蜀。游爲參議官。以文字交。不拘禮。人譏其放。因號放翁。累陞寶章閣待制。致仕。游才氣超逸。尤長於詩。所箸有劍南渭南等集。行於世。

王守仁墓

王守仁墓在紹興縣南花街洪溪。守仁字伯安。明餘姚人。登宏治進士。授刑部主事。改兵部。後巡撫南贛。甯王宸反。起兵勤王。擊破之。以功拜南京兵部尙書。封新建伯。繼又平思恩田州土酋蘇受之亂。後卒於南安。隆慶初。追諡文成。守仁天姿異敏。其學以良知良能爲主。稱姚江派。嘗築室陽明洞。世稱陽明先生。

大山

大山在蕭山縣西南九十里。盤互深遠。一名長山。其南最高者曰鏡臺山。一名白石山。又名筆架山。許詢隱居之所。有元度岩。仙人洞。草木可療疾。因又名百藥山。

石岩山

石岩山在蕭山縣西南十二里。其形如獅。自湘湖中望之。狀態畢肖。因又名獅子峯。獅頭之下。有圓石在河中。四面環水。俗名獅子球。明劉基嘗登山賦。

詩。

覺苑寺

覺苑寺在蕭山縣治東北。香火甚盛。有遠自數百里而來者。寺有大悲閣。宋沈遼爲記。又有胡舜臣畫水壁。相近有祇園寺。亦大叢林也。晉成帝咸和六年許詢捨宅建。號崇代寺。舊有閣藏宋仁宗御書。英宗治平二年改今額。

五洩山

五洩山在諸暨縣西五十里。西接浦江。富陽兩縣界。有泉沿厯五級。下注溪壑。故名五洩。山勢深遠。巖石峻峭。有十六峯。二十五岩。洞谷溪澗之屬。不可勝紀。俗名小雁宕。有寺曰五洩。明宋濂爲碑記。寺有水龍畫。卷而深藏。世傳展舒則大雨。相近有龍潭。晦冥不見底。俗傳龍潛於此。

鐵厓山

鐵厓山在諸暨縣東六十里。岡巒澗壑。盤紆數里。上有二峯。一峯名柯公尖。

有龍湫。一峯岩石峻立。色如鐵。元末楊維禎居此。因以爲號。按維禎字廉夫。諸暨人。初號梅花道人。繼號鐵笛道人。泰定進士。署天台尹。明洪武初。召修禮樂書。作老客婦謠以見意。詣闕留百餘日。所纂敍例略定。卽乞歸。維禎以詩名擅一時。當時詩格纖靡。維禎以雄桀之才挽救之。自成一體。號鐵厓派。所著有鐵厓古樂府等書。

祭忠臺

祭忠臺在餘姚縣龍泉山絕頂。明英宗正統間。王振用事。翰林侍講安福劉球上疏死。餘姚成器與劉素不識面。率同志祭之。因名陳俎豆之石曰祭忠臺。旁刻三大字。王守仁書。

靈緒山

靈緒山在餘姚縣治西。一名嶼山。以上有龍泉。又名龍泉山。爲姚江四靈之一。三峯挺秀如畫。南俯姚江。上有龍泉禪寺。晉成帝咸康二年建。舊有唐虞

世南碑。寺後有更好亭。宋高宗嘗遊此。曰風景更好。因建亭名更好焉。

明塘湖

明塘湖在餘姚縣東北十八里。一名淡水湖。又稱燭溪湖。亦曰獨溪湖。東西南三面距山。惟東北一面爲湖塘。周二十餘里。湖西南一曲。又名梅塢。湖有八景。曰漾塘煙柳、孤山雪梅、顯沙聚鷺、梅澳歸龍、夾溪仙燭、航渡漁舟、白雪霽月、翠屏晴嵐。

鳳鳴山

鳳鳴山在上虞縣東南十餘里。下有鳳鳴洞。高闊丈餘。深數十丈。雙崖峭聳。懸石若墜。飛泉噴瀑。若冰柱水簾。

蘭芎山

蘭芎山在上虞縣西北二十八里。一名蘭風山。山有三嶺。枕帶長江。相傳葛洪遜世居之。瑯琊王方平性好山水。亦嘗垂釣於此。山下有倪子巖。乃明倪

文正公元璐讀書處。

東山

東山在上虞縣西南四十五里。巍然特出。衆峯拱抱。登陟幽阻。至其巔。則軒豁呈露。萬峯林立。煙海渺然。晉謝安所居。旁有薔薇洞。洗屐池。相傳安攜妓遊宴之所。孫盛晉陽秋云。安家于會稽上虞縣。優游山林六七年。聞徵召不至。卽指此山。其故居卽舊國慶寺址。

白馬湖

白馬湖在上虞縣西北。覆蓋湖南。湖築隄屢圯。民以白馬祭之。故名。一名漁浦湖。相傳創自東漢。周四十五里。三面皆山。三十六澗之水。悉匯於湖。中有三山。曰癸巳山、羊山、月山。風景殊清勝。

剡山

剡山在嵯縣治後。北峯名星子。四山迤邐。孤岑獨出。稍下名白塔。支隴延袤。

十數里。俗傳秦始皇東游。使人劓此山。以洩王氣。今山南剡坑是也。其南二里。曰鹿胎山。縣治跨其麓。宋朱子登眺其上。題曰溪山第一。

金庭洞

金庭洞在嵯縣東七十里之金庭山。道書以爲第二十七洞天。金庭洞舊名桐柏山。周四十里。天台華頂之東門也。岩谷深幽。林泉清勝。

三懸潭

三懸潭在嵯縣西南貴門山中。四山石壁如劓。丹翠萬狀。山半泉湧如噴。瀦爲三潭。最幽勝。貴門山本名鹿門山。宋朱子改。

沃洲山

沃洲山在新昌縣東二十五里。高百餘丈。北通四明山。與天姥山對峙。道書以爲第十二福地。有放鶴峯。養馬坡。相傳支遁放鶴養馬處。唐懿宗咸通初。裘甫作亂。嘗據此爲寨。唐白居易沃洲山禪院記云。沃洲山在剡縣南三十

里禪院在沃洲山之陽。天姥岑之陰。南對天台。而華頂、赤城列焉。北對四明。而金庭、石鼓介焉。西北有支遁嶺。而養馬坡、放鶴峯次焉。東南有石橋溪。溪出天台石橋。因名焉。其餘卑岩小泉。如子孫之從父母者。不可勝數。東南山水。越爲首。剡爲面。沃洲天姥爲眉目。夫有非常之境。然後有非常之人棲焉。晉宋以來。因山洞開。厥初有羅漢僧西天竺人白道猷居焉。次有高僧竺潛、支道林居焉。次又有乾興。凡十八僧居焉。高士名人有戴逵、王洽、劉恢、許元度、殷融、郗超、孫綽、桓彥表、王敬仁、何次道、王文度、謝長霞、袁彥伯、王蒙、衛玠、謝萬石、蔡叔子、王羲之。凡十八人。或游焉。或止焉。故道猷詩云：連峯數千里。修林帶平津。茅茨隱不見。雞鳴知有人。謝靈運詩云：暝投剡中宿。明登天姥岑。高高入雲霓。還期安可尋。蓋人與山相得于一時也。自齊至唐。茲山寔荒靈境寂寥。罕有人游。故詞人朱放詩云：月在沃洲山上人。歸剡縣江邊。劉長卿詩云：何人住沃洲。此皆愛而不到者也。觀此。則沃洲山爲高僧隱士。

游棲之所。而林泉勝景。概可知矣。（按嶧縣五代以前曰剡縣。新昌秦爲剡縣。地吳越始置縣）

天姥山

天姥山在新昌縣東五十里。高三千五百丈。周六十里。自括蒼山盤互數百里。至關嶺入縣界。東接天台華頂峯。西連沃洲山。寰宇記云。登此山者。或聞天姥歌謠之聲。道書以爲第十六福地。其最高峯曰撥雲尖。西五里爲蓮花峯。高二千五百丈。周三十里。

石城山

石城山在新昌縣南四里。一名南明山。吳越時改前名爲石城。危巖攢簇。石壁千仞。天台之西門也。自石牛鎮而入。有紫芝天井月峽諸勝。又有夾溪塘。白岩。隴隱岳洞。宋朱子嘗建濯纓亭其上。

括蒼山

括蒼山在臨海縣西南四十里。接仙居縣界。周三百里。巖石聳天。林壑幽邃。一名真隱山。又名天鼻山。亦名蒼嶺。神仙傳。王方平居崑崙。往來羅浮。括蒼山。宋元嘉中。嘗遣名畫寫狀于團扇。

玉峴山

玉峴山在臨海縣東一百七里。舊名黃石。一名黃礁。中有石澗。可容數百人。四圍多林木。陰翳蔽天。山中洩水九層。沿崖注落如白練。東南有鍾乳穴。極幽邃。

龍公嶼

龍公嶼在臨海縣西北七里。壁下有竇。相傳神龍於此出入。天霽常有雲霧。細雨。下有大湫。巖上鑿有石龍竇三字。

芙蓉洞

芙蓉洞在臨海縣東一百四十里。洞有二。形如石鼓。大小相連。近西三四里。

有巨石。高十餘丈。屹立其巔。下有石室。方二丈。玲瓏上通。俗呼穿巖。

二徐墓

二徐墓在臨海縣東南六十九里白巖山。朱子過此。弔以詩。大書有宋高士二徐先生墓。按二徐卽徐中行及子庭筠也。二徐並有孝行。篤學好善。隱居不仕。范純仁嘗薦中行於司馬光。光謂神清氣和。可與進道。

三峯山

三峯山在黃巖縣西六十里。周二十餘里。分上中下三峯。初至下峯。則兩山夾水而入。其勝處名雲莊。風磴。又二里許。卽中峯。兩山蹲踞。名石門。前有巨溪洶激。溪中石柱屹立數十尋。又四里許。卽上峯。石洞空濶。最爲奇勝。

赤城山

赤城山在天台縣北六里。土色皆赤。狀似雲霞。望之如雉堞。孫綽天台賦。所謂赤城霞起而建標也。一名燒山。山有紫雲洞。殊寬廓可容。又有玉京洞。道

書以爲第六洞天。名上玉清平之天。有赤城霞赤城山。記諸石刻。又有餐霞洞。洞有齊一峯。明經孫天祚茂才墓。其頂又有高二十餘丈之梁岳陽王妃塔焉。

瀑布山

瀑布山一名紫凝山。在天台縣西四十里。有瀑布垂流百丈。遙望瑩白如練。冬夏不竭。唐陸羽品此水爲天下第十七。瀑布兩旁多摩厓石刻。

銅壺滴漏

銅壺滴漏在天台縣天台山。以石岩中空如壺。水自上入。復迸罅而出之。故名。距此里許有瀑布曰水珠簾。

國清寺

國清寺在天台縣北十里。隋開皇十八年僧智顛（即智者大師）建。清雍正十一年重建。唐一行嘗於此學算。寺左右有五峯雙澗。寺前有塔。高五十

餘丈。山門前有七小塔及豐干橋。寺內有鵝碑卓錫泉。藏經樓。選佛場。三賢殿。諸勝。三賢殿奉寒山。拾得。豐干像。按寒山拾得。豐干皆唐之高僧。時豐干居天台國清寺。出雲遊。適閩丘胤出守台州。問彼有賢達否。曰寒山文殊。拾得普賢。狀如貧子。又似風狂。及閩丘至。入寺見二人拜之。二人曰。豐干饒舌。遂連臂遁去。閩丘尋其遺物。僅得偈詞焉。

眞覺寺

眞覺寺在天台山。隋開皇時建。寺前竹木茂密。陰鬱蔽日。寺中有唐元和間。梁肅撰徐放書禪修道場碑銘。智者大師示寂於此。故殿內瘞塔在焉。塔有聯云。一悟戒定慧於三言。是謂智者。合儒釋道而一貫。必有師焉。

高明寺

高明寺在天台高明山。距國清寺十五里。智者大師建。寺旁有圓通洞。寺內藏有繡龍衣。紫金鉢。皆隋帝賜智者大師之遺物也。又有貝葉經。來自西域。

字皆梵文。長約六寸許。濶約三寸許。共五十餘頁。貫以繩。

大佛字

大佛字在高山山下。徑二丈餘。下有小字石梁比丘興慈書。此外更有其他石刻。而此間巖石。多狀貌奇巧。令人觀之。留連不忍去。

拜經臺

拜經臺在天台華頂。智者大師拜經處。相近有石碣。鐫天台第一峯五大字。

銅殿

銅殿在天台石梁盡處。明天啟年間。太監徐貴。天台山沙門。如璧募造。殿高可五尺。中有銅羅漢五百。

合掌岩

合掌岩在天台明岩。相傳爲寒山拾得隱身處。與明岩相連者曰寒巖。巖坳有鵲橋。頂有寒山坐石。二巖皆巖石奇古。景色清幽。

萬年寺

萬年寺在天台山。寺門外有萬工池。古杉。寺內多明清碑石。並有清阮元杜
堦陸潤庠等之匾額。及慶親王「志託慈良。萬福所會。心懷利濟。衆善之門」
之聯。

善興寺

善興寺在天台華頂峯。晉天福僧德韶建。寺有土義之墨池。某有聯云「風
聲水聲蟲聲鳥聲梵唄聲。合之一百八擊鐘聲。無聲不寂。天色月色草色樹
色煙霞色。加以四萬千丈峯巒色。有色皆空。」讀此。可想見寺之幽勝矣。此
外山之寺院。尙有蓮峯庵。天封寺。方廣寺。護國寺。藥師庵。桐柏宮（內有伯
夷叔齊石像）等。亦多可遊覽。

萬安院

萬安院在仙居縣西南五十五里。其池深窈。與塵境絕。山環水抱。有茂林修

竹之勝。宋建炎中，薛昂避地居此。

閩風臺

閩風臺在寧海縣北五十里天門山西麓。拔起數千仞。傍有香岩、石井、釣臺、白竹岡諸勝。

方孝孺故里

方孝孺故里在寧海縣東南躍龍山下。

三 金華

洞巖山

洞麓山在蘭谿縣東二十里。山有洞。洞凡六。著名者三。曰白雲、曰紫霞、曰湧雪。東麓有白坑。西有紅坑。長皆五六里。其東北一峯。怪石屹立。名小飛來峯。下有天池泉。流而爲溪。又有天井岩。高可百餘丈。

紫霞山

紫霞山在蘭谿縣東二十五里。山上有巖。色紫形如覆釜。穹窿深廣。可容百人。旁有玲瓏巖。其下爲鷓鴣巢。巖深廣皆數丈。容二三百人。八石溪出焉。

方巖山

方巖山在永康縣東四十五里。平地拔起。四面如削。南通一道。架石梯。飛橋而登。絕頂有二巖對峙。曰透關。俗呼爲峯門。入關地皆平衍。約數百畝。中有池。池側有井。巖石泉洞。爭奇競勝。山北爲壽山。山有五峯。曰固厚。瀑布桃花。覆釜。雞鳴。固厚峯下有石洞。高敞軒露。可容千人。瀑布峯上有龍湫。直下數十丈。如練。及霽久水弱。飄風颺之。濺灑四出。若霧雨然。

陳亮讀書處

陳亮讀書處在小空洞。洞在永康縣東五里龍窟山下。

石鼈潭

石鼈潭在永康縣南五里。昔有人入山經此。遇一大龜。束之歸。龜便能言。曰。

遊不良時。爲君所得。人甚怪之。載上吳王。王命賁之。焚柴萬車。語猶如故。諸葛恪命燃老桑。賁之立爛。見異苑。

劉巖

劉巖在武康縣西三十五里。一名金石巖。亦名玲瓏巖。上有峻巖。側立百丈。轉左曰平水洞。高倚斷崖。下瞰天井。前一山陡削若屏。幄然曰招聖峯。後一山曰仙都壇。崖石巉削。高百餘丈。鑿石梯而上。絕頂少平。明正統十四年。鄉人避寇於此者以萬計。皆得免。

寶掌山

寶掌山在浦江縣北八里。雙峯列峙。沿澗奇石。若虎豹狻猊。鐘鼎刀劍。上下錯列。有懸巖湧出。類翩躚飛舞之狀。

福民山

福民山在湯溪縣東南四十里。高數百丈。峯巒秀拔。林木蓊鬱。上有層樓。登

之眺望。遠見數百里。

王質遇仙處

王質遇仙處在衢縣南二十里爛柯山。卽石橋山。道書謂之青霞第八洞天。梁任昉述異記。晉王質入山採樵。見二童子對奕。質置斧坐觀。童子與質一物如棗核。食之不飢。局終。童子指示曰。汝柯爛矣。質歸鄉里。已及百歲。無復舊時人。

趙抃宅

趙抃宅在衢縣北五里。抃喪繼母。與弟拊廬墓。縣令過。煦榜其居曰孝弟居。卽此。其墓今在縣東四十里。按抃宋西安人。景祐進士。爲殿中侍御史。彈劾不避權倖。京師目爲鐵面御史。神宗立。召知諫院。尋擢參知政事。抃感顧。知遇。朝政有未協者。多所匡正。以太子少保致仕。卒。贈太子少師。諡清獻。抃長厚清修。人不見其喜愠。不治貨業。不畜聲伎。其爲政。因俗施設。猛寬不同。爲

世稱道。

龍邱山

龍邱山在龍游縣東三十五里。一名九峯巖。亦名芙蓉山。後漢龍邱萇隱居處也。山西南五里。爲三疊巖。有石室如層樓。旁有雪巖、獅巖、牛巖、破巖。巖有泉。林木蓊森。風景清秀。

白巖

白巖在江山縣東南四十五里。廣一丈。深倍之。中平曠。可容數百人。瀑布從巖下流。若輕綃高挂。名水簾泉。

目蓮洞

目蓮洞在江山縣西二里。明靜幽曠。如覆石室。瀑布聲響不絕。舊傳目健蓮修行於此。宋徽宗政和間。掘得青提夫人碑。乃目健蓮母也。

孤高亭

孤高亭在建德縣東八十里。宋高宗紹興間。知州吳寅建。趙抃詩。有「寺亭高絕面靈山。迤邐羣峯不可攀」之句。

羨山

羨山在淳安縣東三十五里。形極峭拔。其麓有仙居洞。數洞相接。可通往來。最外一洞。有石如龍蟠。水自龍口下注石盆中。常滿不溢。

金紫峯

金紫峯在淳安縣東北八十里。中峯有圓石。突起數十丈。光瑩無草木。其旁兩峯若俯。每旭日照灼。金紫晃耀。上有九龍瀑布泉。

瑤林洞

瑤林洞在桐廬縣西北四十五里。洞口濶二丈許。梯級而下。五丈餘。有厓。有池。有潭。有穴。壁有五采。

一指石

一指石在桐廬縣西北四十里。長一丈。高五尺。綴巖谷間。以手抵之則搖動。人多則不能動。元楊維禎有詩。

方干故里

方干故里在桐廬縣西南四十五里白雲源。范仲淹謁方干故里詩。有一幽蘭在深處。終日自清芬。一句。後人因建清芬閣。按干字雄飛。爲人質野。喜凌侮。每見設三拜。識者呼爲方三拜。貌寢。又兔闕。故有司不與科名。隱於鑑湖。終身不出。晚遇醫補其脣。因號補脣先生。工詩。歿後。以宰臣張文蔚奏。文人不第者十五人。干與其數。追賜及第。後進私諡爲玄英先生。

謝翱墓

謝翱墓在桐廬縣西巖光釣臺南岸。翱字皋羽。宋長溪人。令蒲城。倜儻有大志。卓厲憤激。不混流俗。雅慕屈平。託興遠游。號晞髮子。嘗爲文天祥參軍。宋亡。天祥死。翱悲不能禁。挾酒登子陵臺。設天祥主。跪酌號泣。以竹如意擊石。

作楚歌招之歌。闕竹石俱碎。後卒。遂瘞於臺南。所著有詩八卷。文二十卷。

靈巖山

靈巖山在遂安縣西北十五里。下有百丈潭。山半有靈巖洞。有龍躋泉。流出爲小澗。循石壁爲瀑布。

大悲巖

大悲巖在壽昌縣南二十里。有石竅僅可容人。曲身以入。爲梯三級而下。有石室曰觀音洞。巖西北一里許。又有一石洞。元大德間臨安人莫子淵棄家學道於此。作石磴曲折數百丈以登。半山有泉飛下。爲縣勝境。

慶雲山

慶雲山在分水縣東南里許。一名五雲山。唐長慶中有五色雲見。凶名施肩吾讀書於此。其巔有洗硯池。

四 甌海

赤水山

赤水山在永嘉縣西北一百二十里。時有赤水出岩下。一名石室山。上有石室。可坐千人。道書以爲第十二福地。亦曰大若巖。相近又有小若巖。東西兩溪。合流其下。匯爲龍潭。

東山堂

東山堂舊在永嘉縣東南積穀山上。宋周行已建。翁卷寄題東山詩有「惟見烟霞起。全無市井喧。鶴來巢木杪。龜出戲蒲根」之句。

讀書堂

讀書堂舊在永嘉縣治後。宋謝歸運建。有詩云。「虛館絕爭訟。空庭來鳥雀。：既笑沮溺津。又晒子雲閣。」

南明山

南明山在麗水縣北七里。上有印月池。旁有獻花巖。高陽洞。洞口有石梁。爲

邑之勝地。

溪雨亭

溪雨亭舊在麗水縣東二十里靈山寺旁。宋紹聖中郡守劉涇建。作詩有「鷓鴣山脚溪聲好。流入人間雨意長」之句。

石門山

石門山在青田縣西七十里。兩峯壁立。對峙如門。石洞幽深。飛瀑噴瀉。上有軒轅邱。道書以爲第三洞天。宋永嘉太守謝康樂始開。其西南相接者曰石樓山。山高聳。雲霧擁之。望若樓臺。

方山

方山在青田縣南二十里。山勢崔巍。石宜鐫刻。世所稱青田石。卽出於此。

浣紗溪

浣紗溪在青田縣長壽峯下。相傳謝康樂入此溪。見二女浣紗。嘲之曰。我是

謝康樂一箭射雙鶴。試問浣紗女。箭從何處落。二女答曰。我是溪中鯽。暫出溪頭食。食罷又還潭。雲從何處覓。遂不見。見輿地志。

劉公墓

劉公墓在青田縣西北夏山。墓字伯溫。元進士。爲江浙儒學提舉。棄官隱青田山。明太祖下金華。徵之。出建禮賢館。以處之。輔太祖定天下。封誠意伯。太祖呼爲老先生而不名。曰吾子房也。所作文章爲一代冠。著有覆瓿集。犁眉公集。行世。正德中。加贈太師。諡文成。嘉靖中。配享太廟。

仙都山

仙都山在縉雲縣東二十三里。高六百丈。周三百里。本名縉雲山。唐天寶七年。有彩雲仙樂之異。敕改今名。道書以爲第二十九洞。奇峯凡百有六。世傳黃帝亦嘗煉丹於此。山有玉虛宮。

玉蓮山

玉蓮山在松陽縣東十五里。下有潭。潭上有巨石如覆鐘。可容百餘人。前有石檻。爲一邑遊觀之勝。

湖山

湖山在遂昌縣西北七十里。越王峯下。溪流縈繞。分夾復合。爲邑之勝境。

靈泉洞

靈泉洞在遂昌縣東十里。形如船屋。可坐十人。泉出其間。爲邑人遊晏之所。

新嶺鳳凰山

新嶺鳳凰山在龍泉縣西十五里。山峯秀麗。中有白雲厓。桃花洞。稱名勝焉。

琉華山

琉華山在龍泉縣南七十里。亦名仙山。頂寬平。有長湖。深不可測。下有琉田。居民以陶爲業。昔有張氏兄弟主琉田窰。其兄所造者佳。世號哥窰。王世貞委宛餘編。宋時處州張生兄弟皆作窰。而兄所作者。視弟稍白。而斷紋多。號

曰。圾碎。卽指此。

大澗

大澗在景寧縣南五十里。高五十餘丈。懸厓直下。飛瀑濺珠。細若輕霧。

福全山

福全山在瑞安縣西四十五里。陶宏景隱居處。道書以爲第三十三福地。有花巖潭。龍潭諸勝。

鰲山閣

鰲山閣舊在瑞安縣西西峴山上。宋建。郡守蘇起嘗有詩云。『賴有此軒相暎帶。盡收佳景在人寰。』

西澗山

西澗山在樂清縣西五里。三面蒼厓峭立。環若翠屏。惟東南軒豁如門。大海橫其前。可望日出。山北有瀑布。從懸厓而下。飛流濺沫。雖盛暑涼氣逼人。

天冠峯

天冠峯在樂清縣雁蕩山謝公嶺右。高五十餘丈。下有雲板洞。前有鳴玉溪。遙遙相對者曰連雲嶂。嶂有挺然特起之峯。曰犀牛望月峯。

鐵城嶂

鐵城嶂在淨名寺西。以巖石深黑壁立如城垣。故名。高可六七十丈。長可二里許。中有水簾谷。維摩洞。諸勝。

靈巖寺

靈巖寺在霞障洞之西南。展旗峯在其右。天柱峯（卽一帆峯又名剪刀峯）在其左。錦屏峯在其後。羣嶂如幃。層巒聳翠。遊人到此。如履仙境焉。

淨名寺

淨名寺在雁蕩之靈峯南。壯麗可觀。有王文治方苞諸人之聯額。出寺遙望。有峯如睡猴者。曰睡猴峯。頭目肢幹。莫勿畢肖。反面卽老猿披衣峯。寺後乃

金鼎峯與伏牛峯。下爲散花龕與蓼花嶂。

燕尾瀑

燕尾瀑在雁蕩龍仁寺左。以瀑水下流如燕尾。故名。其下水匯成潭。曰霞映潭。

石門潭

石門潭在雁蕩東外谷。厓石壁立如門。門下潭水一泓。深杳不可測計。宋人嘗作詩咏之。有「壯哉龍伯宮。幽據雁山脅。巖如峙城壁。南北本相接。衆流欲朝宗。天爲開峩巖」之句。

聽詩叟岩

聽詩叟巖在霞蕩雁嶂。巖石狀如老叟。側耳傾聽者。故名。李燮宣嘗有詩云。「萬笏名山刺眼青。泉聲不斷韻泠泠。我無謝眺驚人句。孤負先生側耳聽。」巖南爲二仙談詩峯。巖下爲雪花天霞障洞。

老僧岩

老僧岩在石門潭南。石狀如僧衣袈裟。合掌而立。形態逼肖。高五十丈。亦名石佛峯。峯下有石佛。相近又有小童巖。

龍鼻洞

龍鼻洞在雁蕩山獨秀峯相近。石形蜿蜒如龍。有頭有尾。有爪有鼻。鼻有兩孔。遙望如眞。洞內有觀泉亭。多題刻。洞外有一線天。洞下有天開圖畫摩崖。字大逾二尺。

羅漢洞

羅漢洞在靈峯。亦名觀音洞。中有樓八層。又有珠簾水。洗心泉。諸勝。右有伏虎洞。一名北斗洞。亦有層樓。洞北里許有碧霄峯。下有碧霄洞。

石梁洞

石梁洞在老僧岩西。有石梁跨其間。故名。洞寬十餘丈。可容千人。夏時避暑。

絕宜。上爲禮佛壇。有石佛三。

龍湫

龍湫有二。在捲圖峯下者曰小龍湫。在一帆峯北者曰大龍湫。龍湫之水。皆自厓下瀉。小者高二百尺。大者高六百尺。飄灑噴激。景狀怪異。遊人到此。嘆觀止焉。石壁有杜審言及宋元人摩厓。湫頂有蕩湖。卽雁宕湫之前。有宴坐亭。觀不足亭。

王十朋墓

王十朋墓在樂清縣東北左源山之梅畧。十朋字龜齡。宋樂清人。幼穎悟。日誦數千言。及長有文行。秦檜死。高宗親策士。擢十朋第一。學者誦其策。以擬古晁董。除祕書郎。孝宗受禪。累遷侍御史。後出守饒州湖州諸郡。以龍圖閣學士致仕。卒諡忠文。十朋在朝不阿權勢。忠貞敢言。出守則恩恤民隱。所至人繪而祀之。

南雁蕩山

南雁蕩山在平陽縣西南百里。北自穹嶺。南至施谷。四五十里。皆雁蕩也。中有明玉峯。峯頂有池。五代時僧願齊尋訪名山於此。曰。此山水盡處。龍雁所居。豈非西域書所謂諾矩羅震思雁蕩龍湫者耶。因結茅其間。山有十三峯。三洞。二巖。澗石類皆奇勝。

白雲山

白雲山在平陽縣西南百里。與雁蕩相接。高出雲表。中有澗。濶數十步。遊者援藤而進。名曰藤道。上有玉簾瀑。泉寒瀑泉。飛淙濺沫。最爲奇勝。

中華名勝古蹟續編目錄

第十二編 湖北

一 江漢

夜泊山 卓刀泉 石照亭 仙棗亭 含山樓 樊山 郎山 寒溪 西山寺

菩薩泉 靈溪觀 龍穴洲 凌岩 荆泉洞 潛山 馮京墓 壺頭山 昌國寺

九宮山 觀音岩 大泉洞 鳳樓岩 滄浪亭 銀山鐵壁 月湖 晴川閣

石榴花塔 琴臺 吳正治墓 天一閣 木蘭山 禪定寺 九嶷山 雙峯山

西湖 董永故里 天慶觀 大崎山 竹樓 快哉亭 四望亭 安國寺 定惠

院 五名山 天臺山 破額山 東禪寺 鮑照墓 兩湖 蘭溪 洄瀾亭 龜

峯山 陳慥隱處 萬松亭 太平山 龍興寺 寶林寺 厲山

二 襄陽

中華名勝古蹟 第十二編 目錄

一
二七—三四

中華名勝古蹟 第十二編 目錄

二

鹿門山 習家池 義犬冢 關門山 孤樓岩 顯陵 觀音岩 空山洞 穿洞
隍城洞 雁橋 宋玉故里 楚昭王廟 武當山 很子潭 學古洞

三

荆宜

三四—四七

龍王洞 蝦蟆碓 黃金藏 黃陵廟 甘泉寺 東山寺 渚宮 江亭 天鵝池
天皇寺 劉鱗之故里 仙女洞 紅匡子洞 蓮臺山 白雲亭 秋風亭 玉
虛洞 左伯桃墓 玉泉山 麥城 百家洞 高家洞 羅漢谷

四

施鶴

四七—四八

月台 蝦蟆池 通天岩

中華名勝古蹟續編

第十二編 湖北

一 江漢

夜泊山

夜泊山在武昌縣南四十里。以駱禪師泊舟於此得名。明太祖兵圍武昌。張必先以岳潭兵來援。至夜婆山。常遇春擊敗之。卽夜泊也。

卓刀泉

卓刀泉在武昌縣賓陽門外十餘里。世傳關公卓刀於此。水色淡碧。味極清甘。其上舊有漢昭烈帝郊壇。今有漢壽亭侯廟。週圍多古柏老松。冬夏青青。森然蔭涂。境地清幽。風物佳勝。

石照亭

石照亭在黃鶴樓下。亦曰石鏡亭。臨厓舊有石如鏡。每夕陽翻照則發光。明末石失。今亭乃清時重建。

仙棗亭

仙棗亭在黃鶴樓後。明代宗景泰四年重建。改名呂仙亭。明統志舊傳亭前棗木未嘗實。一歲忽有實如瓜。太守命小吏采而進。小吏輒私啖之。遂仙去。縣志又傳太守與卒奕。有一異人吹笛來。忽不見。隨卽聲至樓上。惟見石鏡題詩。末書呂字而去。故改今名。

含山樓

含山樓在武昌縣東南靈泉山。宋張芸叟避亂構此。元燬。明初重修。有春風秋風二亭。列置左右。

樊山

樊山在鄂城縣西五里。一名袁山。一名來山。一名西山。一名壽昌山。一名燔

山一名樊岡。山有九曲嶺。亦曰萬松嶺。舊時松陰夾路。特爲幽邃。蘇子瞻與弟子由嘗遊憩於此。建炎後。邑人伐爲棟宇。遂荒。舊有九曲亭。卽位壇。乃孫氏遺跡。又有廣晏亭。唐廣德中建。山下有吳王試劍石。宋蘇子瞻有與弟子由同遊寒溪西山詩。曰：「散人出入無町畦。朝遊湖北暮淮西。高安酒官雖未上。兩脚垂欲穿塵泥。與君聚散若雲雨。共惜此日相提攜。千搖萬兀到樊口。一箭放溜先鳧鷖。層層草木暗西嶺。瀏瀏霜雪鳴寒溪。空山古寺亦何有。歸路萬頃青玻璃。我今漂泊等鴻雁。江南江北無常栖。幅巾不擬過城市。欲踏徑路開新蹊。」（自注：路有直入寒溪。不過武昌者。）卻憂別後不忍到。見子行迹空餘悽。吾儕流落豈天意。自坐迂濶非人擠。行逢山水輒羞歎。此去未免勤鹽齏。何當一遇李八百。（自注：李八百宅在筠州。）相哀白髮分刀圭。又有武昌西山詩。曰：「春江漲蒲萄。武昌官柳知誰栽。憶從樊口載春酒。步上西山尋梅嶺。西山一上十五里。風駕兩腋飛崔嵬。同遊困臥九

曲嶺。褰衣獨到吳王臺。中原北望在何許。但見落日低黃埃。歸來解劍亭前路。蒼厓半入雲濤堆。浪翁醉處今尚在。石臼杯飲無樽疊。爾來古意誰復嗣。公有妙語留山隅。至今好事除草棘。常恐野火燒蒼苔。當時相望不可見。玉堂正對金鑾開。（按此詩在玉堂夜直作）豈知白馬同夜直。臥看椽燭高花擢。江邊曉夢忽驚斷。銅環玉鎖鳴春雷。山人帳空猿鶴怨。江湖水生鴻雁來。請公作詩寄父老。往和萬壑松風哀。」

郎山

郎山在樊山西。一名郎亭山。兩山相接而中斷。江上望如八字。唐元結與孟士源嘗隱此。山下有窪樽石。結有銘序。宋鄧聖求亦嘗作窪樽銘刻之。岩石二山之間有退谷。士源所命名。結有退谷銘。又有杯湖方約一二里。結有杯湖銘。

寒溪

寒溪在樊山下。昔傳盛暑之月。常有寒氣逼人。舊有陶侃讀書臺及吳王讀書臺。吳王井。溪上有寺曰寒溪。亦名資聖寺。初有金佛像。後歸廬山。宋蘇軾菩薩泉銘序。陶侃爲黃州刺史。有漁人得金像。視其款識。阿育王所鑄。文殊師利像也。初送寒溪寺。及侃遷荊州。欲以像行。又力不能動。益以牛車三十乘。乃能至船。船復沒。遂以還寺。其後惠遠法師迎像歸廬山。

西山寺

西山寺在樊山。晉建。宋黃庭堅曾題榜。宋蘇軾遊武昌寒溪西山寺詩云。一連山蟠武昌。翠本蔚樊口。我來已百日。欲濟空搔首。坐看鷗鳥沒。夢逐麝麈走。今朝橫江來。一葦寄衰朽。高設破巨浪。飛屨輕重阜。去人曾幾何。絕壁寒溪吼。風泉兩部樂。松竹三益友。徐州欣有得。芝朮在蓬莠。西上九曲亭。衆山皆培塿。卻看江北路。雲水渺何有。離離見吳宮。莽莽眞楚藪。空傳孫郎石。無復陶公柳。爾來風流人。惟有漫浪叟。買田吾已決。乳水況宜酒。所須修竹林。

深處安井白。相將踏勝絕。更裏三日糗。」

菩薩泉

菩薩泉在樊山。蘇軾菩薩泉銘序。寒溪少西數百步。別爲西山寺。有泉出於嵌竇間。色白而甘。號菩薩泉。

靈溪觀

靈溪觀在鄂城縣南一百五十里靈溪山。吳可象昇仙之地。有鶴籠橋。仙人冶煉井。飛泉石。後橋爲雷震。有篆文曰。昇仙廣濟之橋。

龍穴洲

龍穴洲在嘉魚縣西北。水經注。龍穴洲沙陽洲之下尾也。洲裏有駕部口。宋景平二年迎文帝於江陵。法駕頓此。因以爲名。文帝車駕發江陵至此。黑龍躍出。負帝所乘舟。左右失色。上謂長史王曇首曰。乃夏禹所以受天命矣。我何德以堪之。故有龍穴之名焉。

凌岩

凌岩在蒲圻縣西三里。鳳凰山西麓。骨立嶄削。中有平地數十畝。旁皆峯巒拱秀。最爲幽勝。有白龍池、朝冠石、普陀岩諸景。

荆泉洞

荆泉洞在蒲圻縣西南十二里。中有石臺。又有石田。溝塍悉具。居民歲視其燥溼。以占凶穰。自洞門入行可百步。別有門甚狹。父老云。嘗有好事者裹糧而入。信步趨出。則在崇陽之葛藤坪。相距百餘里。

潛山

潛山在咸寧縣南三十里。形如展旗。上有壇。舊傳葛洪煉丹於此。宋馮京未第時。築室山間讀書。有潛山碑及李唐侯記。

馮京墓

馮京墓在咸寧縣西鳳凰山下。京字當世。宋江夏人。舉進士。自鄉舉禮部。以

至廷試皆第一。嘗知開封府。數月不詣丞相府。韓琦以爲傲。京曰。公爲宰相。從官不往造請。乃以爲公重。非傲也。神宗時。王安石爲政。京論其更張失當。被謫。哲宗卽位。拜太子少師致仕。卒謚文簡。

壺頭山

壺頭山在崇陽縣北二十五里。寰宇記。幽谷深邃。下有溪名桃花洞。水石壺頭灘。三里皆石。石擁流水。纔通小舟。水泛漲方可濟。行旅憚之。如豐湖之口。故名。

昌國寺

昌國寺在崇陽縣西四十里。一名岩頭寺。唐乾符中建。宋治平元年。賜額。有李綱撰碑。舊寺中有頻伽鳥。一名太平雀。和鳴如鳳。雙飛不出數里。

九宮山

九宮山在通山縣南八十里。登山路由太平山。萬竹山。盤折而上。至壺天亭。

前有三峯山。撥雲峯。東有赤松洞。龍鬪岩。西有白龍潭。上有龍井。水可療疾。西南有水口亭。是爲噴雪岩。瀑布數百丈。觸石飛散如雪。旁有雷公洞。伏虎岩。天尊岩。寶陀山。眠雲石。試劍石。後有駱駝嶺。怪松坡。青猿洞。明末李自成兵敗遇此。爲縣人擊死於此。

觀音岩

觀音岩在通山縣南四十里。宋紹興時居民萬俊見雲氣盤鬱異常。尋其源見一洞窈然。廣十餘丈。有石榻。石盞。石果之屬。又有一石如觀音像。旁有人物。森列奇怪。邑宰朱朝嘗爲作記。

大泉洞

大泉洞在大冶縣東四十里。輿地紀勝。洞東西有二。東洞有仙人臥石。石田三十六畝。有石畝。西洞有樵人常見龍鱗於石間。

鳳樓岩

鳳樓岩在陽新縣西百里。岩穴深半里。有石室。蓋石鐘鼓。石龍之屬。

滄浪亭

滄浪亭在陽新縣放生池上。舊時蓮花彌望。夾隄皆垂柳。羣山環列。有浮屠突兀。在雲煙紫翠間。記稱江山之勝。頗似武林西湖。

銀山鐵壁

陽新縣北十五里有銀山寺。後有石壁。宋蘇軾與季仲覽此。書石壁二字。世傳爲銀山鐵壁。

月湖

月湖在漢陽縣北大別山之陰。東以長隄限江。西通漢水。一泓清淺。四圍山色如黛。嵐翠湖光。頗饒風景。

晴川閣

晴川閣在漢陽大別山東麓。明知府范之箴建。取唐雀瀨詩「晴川歷歷漢

陽樹」之句以名。登閣可望見隔江之黃鶴樓。清吳光有詩云：「萬古山樓對黃鶴。一身楚塞吟清秋。羲娥平向窓中過。江漢交迴檻外流。深窟鼃鼃時隱見。盤渦鷗鷺靜沈浮。瀾衡李白今何處。日暮空悲芳草洲。」

石榴花塔

石榴花塔在漢陽城西一里。明統志。宋時有婦事姑至孝。一日殺雞爲饌。姑食而死。姑女訴於官。婦坐罪。無以自明。臨刑乃折石榴花一枝。插地而祝曰：「妾果毒姑。花卽枯瘁。若屬誣枉。花可復生。」其後花果生。人謂天彰其冤。遂立塔花側。以表其事。塔西南馬家湖有歸元寺。寺內有五百羅漢殿。

琴臺

琴臺在月湖旁。俗傳爲俞伯牙鼓琴處。廣約十畝。左界漢水。東對大別。上有層樓清館。足以登眺。而林木翳翳。風景頗佳。及至夏日。湖中芙蓉盛開。尤爲納涼勝地。

吳正治墓

吳正治墓在漢陽縣小麥山。有清康熙三十三年御製碑文。正治字賡菴。清漢陽人。順治進士。官陝西按察使。鋤銖豪強。釋放無辜二百餘人。執法務寬厚。得可矜宥。必爲末減。有折獄才。以太子太傅致仕。卒諡文僖。

天一閣

天一閣在漢口大智門西南。後爲自來塔。前爲東嶽宮。高閣傑出。俯視一切。殊堪遊憩。

木蘭山

木蘭山在黃陂縣北。山勢嵯峨。羣峯攢簇。上有白雲洞。下有黃石洞。左挹蓮湖。右倚玉屏山。流泉怪石。風景頗佳。上有木蘭廟。廟後有墓。並宋時建造。

禪定寺

禪定寺在黃陂縣澗口附近。內有石彌勒佛。高十餘尺。廣八九尺。雕琢極精。

疑出鬼工。又有一鐘。四周鑄般年經。乃明天順時鑄。叩之聲洪遠聞數里。

九巉山

九巉山在孝感縣東北八十五里。一名九宗山。環阜疊嶂。林壑深杳。下有小溪。上有寶陀岩。羅漢岩。又舊有堯夫亭。宋范純仁倅安州。嘗餞客於此。有題名石刻。全山景物幽勝。不減長安之九巉。故名九巉。

雙峯山

雙峯山在孝感縣東北九十里。九巉山之北。兩峯並峙。高三百餘丈。飛瀑懸流。登之可盡江漢之勝。與雙峯對峙者。爲黃草山。險峻孤峭。氣喉寒冷。春夏多霧。咫尺勿辨。

西湖

西湖在孝感縣西北。廣數十頃。隄上有明月臺。神鼎閣。登臨其間。俯視湖光。遙瞻山翠。風物殊勝。

董永故里

董永故里在孝感縣城外半里。有石碑。鐫漢孝子董永故里字。並泐述其葬父償債事。按永東漢千乘人。少失母。獨養父。流寓孝感。父亡。無以葬。乃從里人裴氏貸錢一萬。約後無還。當以身作奴。葬畢。忽道遇一婦人。求爲永妻。永與俱詣。裴氏令織縑三百疋以償。一月而畢。永辭去。婦人乃曰。我天之織女。緣君至孝。天帝令我助君償債。言訖騰空而去。

天慶觀

天慶觀在沔陽縣北。一名紫陽觀。舊有三色柏及宋徽宗賜金字碑。

大崎山

大崎山在黃岡縣東北一百六十里。接麻城縣界。峯巒迴合。飛瀑百道。下匯爲澗。澗旁多石木藤蘿。西南有留雲洞。山上有龍井。旱則往往禱雨於此。

竹樓

竹樓在黃岡縣治西北。宋王禹偁建。有記。文曰：「黃岡之地多竹。大者如椽。竹工破之。剝去其節。用代陶瓦。比屋皆然。以其價廉而工省也。予城西北隅。雉堞圯毀。藜莽荒穢。因作小樓二間。與月波樓通。遠吞山光。平挹江瀨。幽闔遠。不可具狀。夏宜急雨。有瀑布聲。冬宜密雪。有碎玉聲。宜鼓琴。琴調和暢。宜咏詩。詩韻清絕。宜圍棋。子聲丁丁然。宜投壺。矢聲錚錚然。皆竹樓之所助也。公退之暇。被鶴氅衣。戴華陽巾。手執周易一卷。焚香默坐。消遣世慮。江山之外。第見風帆沙鳥。煙雲竹樹而已。待其酒力醒。茶煙歇。送夕陽。迎素月。亦適居之勝概也。彼齊雲落星。高則高矣。井幹麗譙。華則華矣。止於貯妓女藏歌舞。非騷人之事。吾所不取。吾聞竹工云。竹之爲瓦。僅十稔。若重覆之。得二十稔。噫。吾以至道乙未歲。自翰林出滁上。丙申移廣陵。丁酉又入西掖。戊戌歲除日。有齊安之命。己亥三月到郡。四年之間。奔走不暇。未知明年又在何處。豈懼竹樓之易朽乎。後之人與我同志。嗣而葺之。庶斯樓之不朽也。」

快哉亭

快哉亭在黃岡縣南。宋蘇轍有記。文曰。一江出西陵。始得平地。其流奔放。肆大南合。湘沅北合。漢沔其勢益張。至於赤壁之下。波流浸灌。與海相若。清河張君夢得。謫居齊安。卽其廬之西南爲亭。以覽觀江流之勝。而余兄子瞻名之曰快哉。蓋亭之所見。南北百里。東西一舍。濤瀾洶湧。風雲開閣。晝則舟楫出沒於其前。夜則魚龍悲嘯於其下。變化倏忽。動心駭目。不可久視。今乃得玩之几席之上。舉目而足。西望武昌諸山。岡陵起伏。草木行列。煙消日出。漁夫樵父之舍。皆可指數。此其所以爲快哉者也。至於長洲之濱。故城之墟。曹孟德孫仲謀之所睥睨。周瑜陸遜之所馳騫。其流風遺跡。亦足以稱快世俗。昔楚襄王從宋玉。景差于蘭臺之宮。有風颯然至者。王披襟當之。曰快哉。此風寡人所與庶人共者耶。宋玉曰。此獨大王之雄風耳。庶人安得共之。玉之言蓋有諷焉。夫風無雄雌之異。而人有遇不遇之變。楚王之所以爲樂。與庶

人之所以爲憂。此則人之變也。而風何與焉。士生於世。使其中不自得。將何往而非病。使其中坦然。不以物傷性。將何適而非快。今張君不以謫爲患。收會稽之餘。而自放於山水之間。此其中宜有以過人者。將蓬戶甕牖。無所不快。而況乎濯長江之清流。挹西山之白雲。窮耳目之勝。以自適也哉。不然。連山絕壑。長林古木。振之以清風。照之以明月。此皆騷人思士之所以悲傷憔悴而不能勝者。烏睹其爲快也。」

四望亭

四望亭舊在黃岡縣治東。唐太和中刺史劉嗣之築。下有魚池。陸游云。亭與雪堂相對。宋蘇軾有雨晴後步至四望亭下魚池上。遂自乾明寺前東岡上歸詩二首。其一云。「雨過浮萍合。蛙聲滿四隣。海棠真一夢。梅子欲嘗新。拄杖閒挑菜。鞦韆不見人。殷勤木芍藥。獨自殿餘春。」高亭廢已久。下有種魚塘。暮色千山入。春風百草香。市橋人寂寂。古寺竹蒼蒼。鶴鶴來何處。號鳴

滿夕陽。」

安國寺

安國寺在黃岡縣東南二里。宋韓琦曾寓寺讀書。蘇軾嘗遊憩其中。有安國寺尋春詩云。「臥聞百舌呼春風。起尋花柳村村同。城南古寺修竹合。小房曲檻敲深紅。看花歎老憶年少。對酒思家愁老翁。病眼不羞雲母亂。鬢絲強理茶煙中。遙知二月玉城外。玉仙洪福花如海。薄羅勻霧蓋新妝。快馬爭風鳴雜珮。玉川先生真可憐。一生耽酒終無錢。病過春風九十日。獨抱添丁看花發。」

定惠院

定惠院在黃岡縣東南。蘇軾嘗寓於此。有定惠院寓居月夜偶出詩曰。「幽人無事不出門。偶逐東風轉良夜。參差玉宇飛木末。繚繞香烟來月下。江雲有態清自媚。柳露無聲浩如瀉。已驚弱柳萬絲垂。尙有殘梅一枝亞。清詩獨

吟還自和白酒已盡誰能借。不惜青春忽過。但恐歡意年年謝。自知醉耳
愛松風。會揀霜林結茅舍。浮浮大甌長炊玉溜溜。小罪如壓蔗。飲中真味老
更濃。醉裏狂言醒可怕。閉門謝客對妻子。倒冠落珮從嘲罵。又曰、「去年花
落在徐州。對月酣歌美清夜。今年黃州見花發。小院閉門風露下。萬事如花
不可期。餘年似酒那禁瀉。憶昔扁舟泝巴峽。落帆樊口高桅亞。長江袞袞空
自流。白髮紛紛寧少借。竟無五畝繼沮溺。空有千篇凌鮑謝。至今歸計負雲
山。未免孤衾眠客舍。少年辛苦真食蓼。老境安閒如啖蔗。饑寒未至且安居。
憂患已空猶夢怕。穿花踏月飲村酒。免使醉歸官長罵。」又一詩。題曰寓居
定惠院之東。雜花滿山。有海棠一株。土人不知貴也。詩曰、「江城地瘴蕃草
木。只有名花苦幽獨。嫣然一笑竹籬間。桃李漫山總麤俗。也知造物有深意。
故遣佳人在空谷。自然富貴出天姿。不待金盤薦華屋。朱唇得酒暈生臉。翠
袖捲紗紅暎肉。林深霧暗曉光遲。日曉風輕春睡足。雨中有淚更悽愴。月下

無人更清淑。先生食飽無一事。散步逍遙自捫腹。不問人家與僧舍。拄杖敲門看修竹。忽逢絕豔照衰朽。歎息無言揩病目。陋邦何處得此花。無乃好事移西蜀。寸根千里不易致。銜子飛來定鴻鵠。天涯流落俱可念。爲飲一樽歌此曲。明朝酒醒還獨來。雪落紛紛那忍觸。一寺中舊有嘯軒。軾有定惠院顛師爲予竹下開嘯軒詩。曰。啼鳩催天明。喧喧相詆譌。暗蛩泣夜永。唧唧自相弔。飲風蟬至潔。長吟不改調。食土蚓無腸。亦自終夕叫。鳶貪聲最鄙。鵲喜意可料。皆緣不平鳴。慟哭等嬉笑。阮生已蠹率。孫子亦未妙。道人開此軒。清坐默自照。衝風振河海。不能號無發。累盡吾何言。風來竹自嘯。」

五名山

五名山在黃安縣東南二十里。其陰列山如屏。其陽凹嵌如屋。迤而西。有峯如蓋。羣然合杳。狀如窩然。俗因名曰天窩。林泉木石。最爲幽勝。中有腴田十餘畝。窩內隆冬不寒。盛夏不暑。明嘉靖中知府周思九改曰五雲山。

天臺山

天臺山在黃安縣西北一百里。嶺有天臺。高百餘仞。四面皆石壁。惟石磴一徑可上。約廣數畝。山有湧泉。冬夏不竭。舊有石刻二。一宋理宗端平年鑄。一嘉熙年鑄。

破額山

破額山在黃梅縣西北三十里。一名西山。山有四祖寺。亦名正覺寺。唐高祖時建。爲四祖道信禪場。寺前有靈澗橋。上鑄碧玉流三字。柳公權書。又有卓錫泉。洗筆池。石魚磯。爲四祖遺跡。附近一山曰東山。一名馮茂山。山有五祖寺。亦名眞慧寺。唐高宗咸亨時五祖宏忍禪師建。按道信姓司馬氏。其先世居河內。後徙蘄州。武德中居於雙峯山。太宗三詔不起。永徽初坐逝。代宗廣德時。賜號太醫禪師。是爲四祖。宏忍姓周氏。黃梅人。貞觀間居東禪寺。咸亨中入馮茂山結庵。高宗上元中卒。廣德間賜號大蒲禪師。是爲五祖。

東禪寺

東禪寺在黃梅縣西南。名勝志、東禪寺號蓮花寺。乃五祖傳衣鉢於六祖處。有六祖簸糠池、墜腰石。及吳道子傳衣圖。按六祖曰能惠。姓盧氏。新州人。事宏忍禪師。就舂米之役。一日師會衆傳法。大弟子神秀爲偈書壁云。身似菩提樹。心如明鏡臺。時時勤拂拭。勿令惹塵埃。能不識字。請人書曰。菩提本無樹。明鏡亦非臺。本來無一物。何處惹塵埃。師見之。遂傳法。後度嶺居韶州。爲禪家南京之祖。神秀姓李氏。尉氏人。五祖器異之。謂其懸解。圓照。後居荊州當陽山。爲禪家北京之祖。亦稱六祖。

鮑照墓

鮑照墓在黃梅縣北半里。墓前舊有俊逸亭。取杜甫詩俊逸鮑參軍句意。照字明遠。北朝時東海郟人。仕宋。爲臨海王參軍。工詩。華瞻清新。嘗流寓黃州。廣濟縣東北東衝山上有讀書臺。相傳照曾讀書其上。

兩湖

兩湖在蘄春縣東一里。亦名諸家湖。東通廣濟縣馬口湖。入大江。民多業漁。於此。曲折周迴。凡二三十里。春多桃李。夏盛芙蕖。舊爲州之名勝地。

蘭溪

蘭溪在蘄水縣東。源出箬竹山。舊時其側多蘭。故名。輿地紀勝。蘭溪泉。陸羽茶經以爲天下第三泉。余章三泉記。鳳山之陰。蘭溪之陽。有泉出石罅。爲蘭溪。其在寺庭之除。爲陸羽烹茶之泉。其在鳳山之陰。爲逸少澤筆之井。王陸二水。皆蘭溪一源耳。

洄瀾亭

洄瀾亭在蘄水縣南蘭溪岸。蘇軾遊此。見水盤旋。書二字于石壁。後人因爲立亭。又嘗月夜泛舟於此。

龜峯山

龜峯山在麻城縣東六十里。一名龜頭山。舉水所出。春秋吳楚戰于柏舉。卽此。山多怪石虬松。上有厓刻唐人詩。又有白龍、黑龍兩井。及觀音岩、噴雪厓諸勝。

陳慥隱處

麻城縣西南七十里岐亭鎮杏花村。乃宋陳慥隱處。舊有杏林、杏泉遺蹟。其墓亦在村。慥太常卿青神陳希亮季子。嘗與蘇軾同學於道士張易簡。以溪山自娛。隱居黃州。號龍邱子。又號方山子。蘇軾爲作方山子傳。文曰：一方山子光黃閭隱人也。少時慕朱家郭解爲人。閭里之俠皆宗之。稍壯折節讀書。欲以此馳聘當世。然終不遇。晚乃遯於光黃間。曰岐亭。庵居蔬食。不與世相聞。棄車馬。毀冠服。徒步往來。山中人莫識也。見其所著帽方聳而高。曰：此豈古方山冠之遺像乎。因謂之方山子。余謫居於黃。過岐亭。適見焉。曰：嗚呼。此吾故人陳慥季常也。何爲而在此。方山子亦矍然。問予所以至此者。余告之。

故俯而不答。仰而笑。呼余宿其家。環堵蕭然。而妻子奴婢皆有自得之意。余既聳然異之。獨念方山子少時。使酒好劍。用財如糞土。前十九年。余在岐山。見方山子從兩騎。挾二矢。遊西山。鵲起於前。使騎逐而射之。不獲。方山子怒。馬獨出一發得之。因與余馬工論用兵。及古今成敗。自謂一時豪士。今幾日耳。精悍之色。猶見於眉間。而豈山中之人哉。然方山子世有勳閥。當得官。使從事於其間。今已顯聞。而其家在洛陽。園宅壯麗。與公侯等。河北有田。歲得帛千匹。亦足以富樂。皆棄而不取。獨來窮山中。此豈无得而然哉。余聞光黃閒多異人。往往佯狂垢汙。不可得而見。方山子儻見之歟。」

萬松亭

萬松亭舊在麻城縣西七里岡。蘇軾有詩。序曰。麻城縣令張毅植萬松於道。周以芘行者。且以名其亭。去未十年而松之存者。十不及三四。傷采者之不嗣其意也。故作是詩。詩云。一十年栽種百年規。好德無人助我儀。縣令若同

倉庾氏。亭松應長子孫枝。天公不救斧斤厄。野火解憐冰雪姿。爲問幾株能合抱。殷勤記取角弓詩。」

太平山

太平山在安陸縣西九十里。道由石門山馬鬃嶺而上。甚險峭。爲郡名勝。有飛泉迎陽。水簾羅漢。金庭五湖。明張三丰嘗隱居於此。三丰遼東人。有道術。一食盡數斗。或數月辟穀。一童子嘗從之遊。語人曰。張出遊必偕我。但令我閉目。一日竊視。乃空中也。三丰聞之。遂遣去。乃邀父老登山爲別。揖衆使坐。旋下山取食物。往返二百里。頃刻而至。後不知所終。

龍興寺

龍興寺在應山縣東二十里。天井澗。幽窗迂曲。自澗口入。凡九曲。五里許。至山門石梁。正殿後毘盧殿。平揖諸峯。風景殊佳。

寶林寺

寶林寺在應山縣北二十里前臨大河。基周數里。後有松栗二坪。木皆參天。宋元皆有碑碣。明洪武間賜名正覺寺。應山之大叢林也。

厲山

厲山在隨縣北四十里。一名烈山。亦名重山。又名麗山。禮記注厲山氏炎帝也。起於厲山。卽此山下有一穴。云是神農生處。又有大廣地。外有兩重塹。中有九井。相傳神農旣育。九井自穿。汲一井則衆井皆動。

一一 襄陽

鹿門山

鹿門山在襄陽縣東南三十里。襄陽記鹿門山舊名蘇嶺山。建武中襄陽侯習郁立神祠於山。刻二石鹿夾神道口。俗因謂之鹿門廟。遂以廟名山也。後漢逸民傳龐公者襄陽人也。荊州刺史劉表數延請不能屈。後攜妻子登鹿門山采藥不返。卽此。清王士禛漢江望鹿門山詩云「大堤一長望。窈窕紆

林壑聞有龐公居。攜家因采藥。僧歸鹿門寺。帆轉襄陽郭。耆舊復何人。煙霞今寂寞。唐孟浩然嘗隱居此山。夜歸鹿門歌云。一山寺鳴鐘晝已昏。漁梁渡頭爭渡喧。人隨沙岸向江村。余亦乘舟歸鹿門。鹿門月照開烟樹。忽到龐公樓隱處。岩扉松逕長寂寥。唯有幽人自來去。按浩然唐襄陽人。少好氣節。喜拯人患難。年四十遊京師。嘗於大學賦詩。一座嘆服。無敢抗。一夕王維私邀入署。俄而玄宗至。維以實告。帝曰。朕聞其人而未見也。召問其詩。浩然再拜誦所爲詩。至不才明主棄之句。帝曰。朕未嘗棄卿。奈何誣我。因放還。張九齡辟爲荊州從事。後采訪使韓朝宗約同至京師。欲薦諸朝。會故人至。劇飲不赴。開元二十八年卒。其墓在今縣東南鳳林山。所著有詩集四卷。行於世。

習家池

習家池在襄陽縣南十餘里白馬山下。水徑注。習郁依范蠡養魚法作大陂。

陂長六十步。廣四十步。池中起釣臺。池北亭。郁墓所在也。其水下入沔。晉山濤子簡。鎮襄陽。每出遊。至習家池。上置酒。輒醉而歸。名曰高陽池。清王士禛有習家池詩曰。一山公酩酊處。遺跡峴山頭。院靜寒山落。川明宿霧收。依然池水上。遙接漢江流。谷口微鐘發。蒼茫起白鷗。」

義犬冢

義犬冢在襄陽城南。干寶搜神記云。昔吳王孫權時。有李信純。襄陽紀南人。家養一犬。字曰黑龍。一日信純城外飲酒大醉。歸家不及。臥草中。遇太守鄧遐出獵。見田草深。遣人縱火。斃之。臥處有一溪。相去三五十步。犬即奔往。入水溼身。臥處周迴。以身溼之。火至溼處即滅。犬運水困乏。致斃於側。信純聞於太守。太守憫之。命具棺衾葬之。今紀南有義太冢。高十餘丈。

關門山

關門山在鍾祥縣西北一百里。有石如屏。障塞山口。儼若關門。其上有石鳳

洞。列石攢峙。如鳳昂首。中容數十人。

孤樓岩

孤樓岩在鍾祥縣東八十里。厓懸數十丈。樓構其巔。厓下有龍潭。厓間乳水滴成石佛立像。鬚眉宛然。

顯陵

顯陵在鍾祥縣東十里。純德山陽。明世宗本生父興獻王也。世宗卽位。追尊爲興獻皇帝。名其墓曰顯陵。陵前繞以水。水上跨橋。工甚精。橋之北有石獸石人。再進有一池。作長方形。池底爲銅。擲石於中。鏗然作響。更進則墓在焉。墓前舊有之子殿。早經傾圮。今惟石礎石卓存耳。

觀音岩

觀音岩在京山縣東二十里。頂有瀑布。分流四派。灌田數百頃。其下石壁峭立。形態詭異。有洞數處。高敞如屋。明嘉靖中。同知陳良謨引泉爲池。池北舊

有橋亭曰爽心亭。

空山洞

空山洞在京山縣南二十五里。一名空陵洞。洞口有石鼓。擊之有聲。中有仙女、石鏡、石臺等。相傳昔人秉燭入遊。約二里許。見大河奔湍甚急。乃還。

穿洞

穿洞在京山縣東北六十里。去五寶岩里許。一山蜿蜒東行。屈曲相對。劃分兩洞。中有陂。諸谷水所會。皆稻田。欲灌溉則決陂北流。足則導流南出。上爲孔道。中空而外不見。亦一勝概。

隍城洞

隍城洞在京山縣西北二十五里。有小穴。石塞其穴。去石得一大洞。虛明宏敞。中多奇勝。

雁橋

雁橋在天門縣西門外。一名西橋。一名雁叫橋。相傳陸羽爲嬰兒時棄此。羣雁以翼覆之。因名。按羽字鴻漸。有僧得諸水濱。初不知所生。旣長。以易自筮。得蹇之漸。曰。鴻漸於陸。其羽可用爲儀。乃以陸爲氏。名而字之。幼時其師教以行書。答曰。終鮮兄弟。而絕後嗣。得爲孝乎。師怒。使糞除污。以苦之。又使牧牛。潛以竹畫牛背爲字。得張衡兩都賦。不能讀。嘆曰。歲月往矣。奈何不知書。嗚咽不自勝。因亡去。爲優人作詼。諧數千言。太守李齊物異之。授以書。遂廬縣西之天門山。上元初。又隱居苔溪。號桑苧翁。又號竟陵子。詔拜太常寺太祝。不就。杜門著書。梁豁漫志備載其目。然今所傳者。止茶經三卷耳。

宋玉故里

宋玉故里在宜城縣南三十里。其墓亦在於此。明嘉靖中。嘗建祠於其旁。又秭歸縣東二里相公嶺上。亦有宋玉宅。乃玉從屈原遊學時所居也。江陵縣城西三里。又有宋玉宅。乃服官郢都時所居也。北周庾信嘗居之。

楚昭王廟

楚昭王廟在宜城縣南十餘里。宜城故城內。唐韓愈有題楚昭王廟詩。其宜城驛記云。此驛置在古宜城內。驛東北有井。傳是昭王井。有靈異。井東北數十步。有楚昭王廟。有舊時高木萬株。歷代莫敢剪伐。尤多古松大竹。舊廟屋極宏盛。今惟草屋一區而已。然向左側人。尚云每歲十月。民相率聚祭其前。廟後小城。蓋王居也。其內處偏高。廣員八九十畝。號殿城。當是王朝內之所也。元和十四年二月二十日題詩云。『邱墳滿目衣冠盡。城闕連雲草樹荒。猶有國人懷舊德。一間茅屋祭昭王。』

武當山

武當山在均縣南一百里。一曰太和山。亦曰籛上山。又曰仙寶山。一曰謝羅山。高二千五百丈。周廻五百里。有二十七峯。三十六岩。二十四澗。五臺。五井。三泉。三潭。山形特秀。異於衆岳。歷代修道之士。幽居之徒。如陰長生。尹喜。陳

希夷等皆曾棲遲於此。至今有石室、經臺諸遺蹟。山之最高峯曰天柱，亦曰紫霄。岩曰紫霄岩。明永樂中嘗營建宮館。其他僧寺、道院、棟宇相望。

很子潭

很子潭在均縣北。水經注：潭有石磧州，長六十丈，廣十八丈。世以此州爲很子葬父於斯。故潭得厥目焉。陰縣（卽穀城）很子家貨萬金，而自小不從父語。父臨亡，意欲葬於山上，恐兒不從，故命言葬我著渚下石磧上。很子曰：我由來不奉教，今從語，遂盡散家財，作石冢，積土繞之，成一洲。很子是前漢人。

學古洞

學古洞在竹山縣北五十里。一名學堂洞，洞極幽邃，其規制像學舍，深濶容衆。檯、欂、硯俱石。相傳孔子適楚講學於此。

三 荆宜

龍王洞

龍王洞在宜昌縣北十五里。洞出絕壁間。離地二丈餘。中平敞約二畝。石室空隙。可容萬餘人。上有石懸出洞外十餘丈。

蝦蟇碕

蝦蟇碕在宜昌縣西北三十里石鼻山下。宋黃庭堅曰。舟中望之。願頷口吻。甚類蝦蟇。洞中石氣清寒。流泉激激。泉味亦不甚甘。但冷熨人齒。陸游曰。水品所載第四泉是也。清王士禛登蝦蟇碕詩云。一黃牛打鼓朝發船。碧波白鳥爭清妍。迴首名山大川閣。鳥尾已捩西陵煙。三峽欲盡尙迤邐。云十二碕紛鉤連。頗聞中有第四泉。唐王谷水差隨肩。峽窮碕轉詫奇事。忽見飛瀑流琤潺。爬沙終古此岩側。青冥無路誰夤緣。江風吹笠冷毛髮。峽雲挾雨鳴船舷。大索瓶資貯飛雪。旋去屐齒窮危巔。橫斜拾級一徑上。藤梢橘刺相糾纏。皴皴槎牙澀苔鮮。清泉百道爭涓涓。陰洞終古闕白日。神漢噴薄鍾乳堅。石

壁。麤惡艱礪錯。題名豈辨唐宋年。永叔涪翁詩不滅。誰爲好事重鎚鑄。名山蒙頂壓顧渚。（自注蒙山茶出蜀名山縣）春芽開裏勞烹煎。下岩轉舵未忍去。下牢關外斜陽懸。」

黃金藏

黃金藏在蝦蟆碚側。昔人于石竇中得金簡易傳。故名。方輿勝覽夷陵（卽宜昌）縣有寶軸祕函藏岩竇中。自宋紹興間陳膺訪故老謂其書皆金版。悉古易傳。但曰易無周字。經與今之卦辭略同。傳與今之彖象絕異。

黃陵廟

黃陵廟在宜昌縣西黃牛峽。一名黃牛廟。三國蜀漢建祀禹。舊有神龜金蓮花及宋歐陽修詩石刻。清王士禛黃陵廟詩云「峽裏黃陵廟。千秋俎豆新。禹功思癸甲。靈笈佐庚辰。灘石冬逾壯。風帆捷有神。旌旗臨絕壁。長照大江濱。」秭歸來百里。突兀見黃牛。（自注廟後峯頂有人牛像宛然如畫）

下水纔朝暮。行人已白頭。山川夔路險。疏鑿禹功留。尙憶平成日。茫茫辦九州。

甘泉寺

甘泉寺在宜昌縣西南十里。宋蘇軾留題有峽州甘泉寺詩。題下自注姜詩故居。詩云。一輕舟橫江來。弔古悲純孝。婉變見遺貌。清泉不可挹。涸盡空石窖。古人飄何之。惟有鳳竹開。行行翫邨落。戶戶懸網罩。民風坦和平。開戶夜無鈔。叢林富筍茹。平野絕虎豹。嗟哉此樂鄉。毋乃姜子教。一陸游入蜀記。甘泉寺竹橋石磴。甚爲幽趣。有淨煉洗心二齋。下臨江山。頗疏豁。法堂之右。水徑數十步。至孝婦泉。謂姜詩妻龐氏也。泉上有龐氏祠。

東山寺

東山寺在宜昌縣東北五里。寺之前殿爲攬勝樓。高數十餘丈。登樓西望。見山水環抱。江城如圖。層巒起伏。或隱或見。宋歐陽修有詩。其後院有東山草

堂。乃近人所新建。

渚宮

渚宮舊在江陵縣城內西北隅。名勝志。渚宮楚之別宮。梁元帝於渚宮故地。修造臺榭。卽此。宋蘇軾渚宮詩云。一渚宮寂寞。依古郢。楚地荒茫。非故基。二王臺閣已鹵莽。（自注。湘東王高氏）何況遠問縱橫時。楚王獵罷擊靈鼓。猛士操舟張水嬉。釣魚不復數魚鱉。大鼎千石烹蛟螭。當時郢人架宮殿。意思絕妙。般與倕。飛樓百尺照湖水。上有燕趙千蛾眉。臨風揚揚意自得。長使宋玉作楚辭。秦兵西來取鐘簾。故宮禾黍秋離離。千年壯觀不可復。今之存者蓋已卑。池空野迥樓閣小。惟有深竹藏狐狸。臺中絳帳誰復見。臺下野水浮清漪。綠窗朱戶春晝閉。想見深屋彈朱絲。腐儒亦能愛聲色。何用白首談孔姬。沙泉半涸草堂在。破窗無紙風颼颼。陳公蹤蹟最未遠。七瑞寥落今何之。百年人事知幾變。直恐荒廢成空陂。誰能爲我訪遺蹟。草間應有湘東碑。

江亭

江亭在江陵縣城南大江北岸。宋黃庭堅得吳城龍女詞處。其詞曰。「簾捲曲闌獨倚。江展暮雲無際。淚雨不曾晴。家在吳頭楚尾。數點雪花亂委。撲漉沙鷗驚起。詩句欲成時。沒入蒼煙叢裏。」

天鵝池

天鵝池在江陵縣西四十里。明宋登春隱於此。登春亦號鵝池生。某爲之傳曰。「鵝池生者。姓宋氏名登春。字應元。趙郡新河人。生壯歲。顛髮即衰白。因自號海翁人。業以海翁稱之。晚居江陵之天鵝池。更號鵝池生。宋氏故新河農家。其先嘗累高貲。生少失父母。以亡訾省家益貧。然性嗜酒。家貧不能長得酒。則時時發憤讀古人書。見前世結纓擊筑。棄印諸賢豪。急難奇節。未嘗不慷慨悲歌泣數行下也。生始慕俠。能挽強馳騎。聞出其餘智爲小詩。輒自

喜不欲以示人。又稍稍通繪事。師江夏吳偉鄰之父。有頎而鬚者。生戲爲之貌。絕肖。父因勸生益習。此可作生業。何乃日沈酣落魄里中也。生不應。以是里中盡目爲狂生。亡所知名。年三十。會一歲間。妻子女五人俱相繼死。生仰天歎曰。咄嗟天乎。將驅我於埃壒之外乎。遂屏家於其兄。而自囊書遠遊。至博陵。博陵有故所善客。憐之。餼之塾舍。二年。生默默不自得。竟謝去。去之京師。日跨一蹇驢。行長安道中。往來覓詩。方是時。臨淄布衣謝榛。以詩遊公卿間。聲籍甚。生間得其詩。唾之曰。作詩何爲者。而令七尺軀。津津諛貴人。丐活耶。居京師月餘。亡所遇。又去之渤海。入兗州。登嶧山。觀秦皇帝遺碑。還居長白山。一蕭寺。出囊中故所貯漢魏盛唐名家詩。閉關揣摩。如是者三年。頗窺作者之戶。遂大放厥詞。而於五言尤工。眼駸駸白。亡今人矣。又去而浮淮海。渡揚子江。登北固山。以望金陵鍾山。紫氣過雲陽。匍伏延陵季子祠下。涉吳會。訪錢塘天竺靈隱諸峯。已復走徐青。歸新河。數日。又去出居庸。循太行山。

而西。窮關陝澤。潞諸邊塞。其在井陘。嘗居龍窩寺。餅粟罄矣。寺僧厭苦之。生曰。僧無窘我。我試繪一小圖。持至市中。當得粟。已而果鬻粟五升。伺粟不盡。不更繪。而市人爭欲得生繪。則日擔粟詣門相聒。生不能堪。乃避至城外。一山樓。已由棧道入西川。遊峨眉。山遡巫巴。下荆鄂。將達於潯陽。返於黃迂。雲夢。而北走大梁。偶憩鈞州酒肆。而鈞州有黨中丞者。得其所題酒肆中絕句詩。強致之家。留數月。復自宛涉襄。過京山。生所跨驢蹶於唐氏之淖。傾其囊中書。曝之衢。唐氏異生所爲。要與之飲食。歡相得也。遂主唐氏。一歲而行。唐氏爲刻其詩。傳荆郢間。更贈生二童子。卽生所呼爲丹砂白石者。生挾二童子。轉江陵。登王粲樓。讀其賦。感昔賢流寓地。有終焉之志。始生數年前。嘗至江陵。居城西。開元觀。故遼王奇其詩。召謁便殿。生久在遼王所。絕不與用事者比。遼王嘗召生遊別宮。聲伎滿前。他客或故爲調笑。以悅遼王。生第端坐。竟日夜。卽飲至大醉。目不流睨。遼王益敬憚生。每見生。輒爲斂容。生之不及。

於難以此。遼王廢生不樂居江陵。乃自携少貲逍遙七澤間。最後又還江陵。遍謝其故所往來人。而斥二童子姑去。乃自童髮爲頭陀。不知其所之。

天皇寺

天皇寺在江陵縣東。梁建後改名乾明寺。舊有晉王羲之書張僧繇圖孔子暨顏子十哲形像。唐時僧道悟居此寺。道悟婺州人。有道行。名重當時。

劉麟之故里

劉麟之故里在石首縣西陽岐山下。麟之字遺民。一字子驥。晉南陽人。嘗作柴桑令。因又號柴桑翁。與陶淵明周續之稱潯陽三隱。時桓車騎在荊州。張元爲侍中。使至江陵。路經陽岐。俄有一人持半小籠生魚。徑來造船。云有魚欲寄作膾。張乃維舟納之。問其姓氏。云是劉遺民。張素聞其名。大相忻待。麟之了無停意。旣進膾。便去。其居在陽岐官道之側。人物往來。莫不投之。桓冲嘗過其家。麟之方條桑。謂冲旣枉駕。宜先詣家君。冲遂詣其父。父使麟之自

持濁酒菹菜供賓。冲敕人代之。父曰。若使官人。則非野人意也。冲請麟之爲長史。固辭不可。去家百餘里。有孤姥。疾將死。歎息謂人曰。誰爲埋我。惟有劉長史耳。麟之先聞其患病。往候之。值其命終。乃身爲營棺殯送焉。

仙女洞

仙女洞在松滋縣南九十里。高山怪石。洞出其下。洞門可達者四五重。每轉愈曲。極冥邃幽妙之致。

紅厓子洞

紅厓子洞在松滋縣南一百里。山勢巖峩。絕壁有洞。洞門有流水。入數里。復有重門。內有石壁二層。可容數百人。深四十里許。

蓮臺山

蓮臺山在巴東縣南四十里。其山皆怪石林立。中有一石最大。豐上銳下。如蓮花蕊。撼之則動搖欲倒。稍加力則屹然如鐵柱。下有溪。頗深。俯眎不見底。

投以石不應。以聲呼則相響答。旱歲土人輒禱於此。

白雲亭

白雲亭在巴東縣治西。宋寇準建。陸遊曰：巴東白雲亭，天下之幽奇絕境也。羣山環擁，層出疊見，古木森然，往往爲二、三百年物。欄外雙瀑瀉石澗中，跳珠濺玉，冷人肌骨。其下爲慈谿，奔流與江會。

秋風亭

秋風亭與白雲亭相近，亦寇準建。陸遊曰：登秋風白雲二亭，觀萊公手植檜，未嘗不悵然流涕。恨古人之不可作也。清王士禛有巴東秋風亭謁寇萊公詞詩曰：「秋風亭上望，搖落值秋風。巫峽千帆上，荆門一水通。清猿吟楚塞，客淚落巴東。故相還祠廟，淒其伏臘同。」

玉虛洞

玉虛洞在秭歸縣東十里。寰宇記：唐天寶五年，其洞忽開，可容千人。宋陸遊

嘗遊之。入蜀記曰。過白狗峽。肩輿至玉虛洞。洞門纔袤尺。既入宏敞壯麗。如入大宮殿。中有石成幡蓋幢旗鳥獸之屬。東石正圓如日。西石半規如月。其下卽香溪。

左伯桃墓

左伯桃墓在荊門縣西南九十里。春秋時羊角哀與伯桃爲友。聞楚平王賢而歸之。道遇雪。度不能俱生。乃并衣糧與角哀。入樹死。角哀至楚。爲上大夫。王以伯桃賢。備禮葬之。角哀不忍己榮。自盡。因附葬焉。

玉泉山

玉泉山在當陽縣西三十里。本名覆舟山。亦名堆藍山。上有玉泉寺。隋開皇中建。浮屠智覬自天台飛錫來。寺居之。殿前有金龜池。相近有清溪。寺東有顯烈山。又里許。有智者洞。縣志。山中有獸狀如鹿。上下陵谷如飛。每鳴於澗谷。則雨。鳴於罔阜。則高軒。過驗之不爽。

麥城

麥城在當陽東南十五里。水經注沮水東南逕麥城西。寰宇記相傳楚昭王所築。漢建安二十四年。關公聞南郡破。西保麥城。卽此。

百家洞

百家洞在當陽縣西北二十里。洞懸沮水之澗。怪石臨溪。遊者攀蘿而上。下爲深潭。潭旁陡逼無徑。由山嶺委折而入。最幽邃。

高家洞

高家洞在當陽縣北五十里。手板巖。巖左有南臺北臺二洞。相近有臥龍洞。山頂有穴。高廣十餘丈。中有清泉。境地絕幽。

羅漢谷

羅漢谷在遠安縣西北五十里。有石如羅漢。內有水源。土人引以灌田。傍有洞多芝蘭。因名芝蘭洞。洞西瀑布懸流如練。有泉曰魚泉。挹飲甘冽。

四 施鶴

月臺

月臺在恩施縣北。舊高三十丈。其頂平方。父老相傳謂李白謫夜郎時。嘗玩月於此。

蝦蟆池

蝦蟆池在恩施縣一百二十里。舊時池多蝦蟆。方春水生。輒跳擲出岸間。及前趾變爲羽。隨衆禽飛去。土人常得之。雀網中云。

通天巖

通天巖在恩施縣東十五里。岩上有竅。可以窺天。雲霞煥彩。仰而見之。下有深潭。俯視不見底。



中華名勝古蹟續編目錄

第十三編 湖南

一 湘江

昭山 栖霞谷 金牛岡 道鄉臺 仙壇嶺 洞陽山 王仙山 章仙山 醴泉

三刀石 近思書院 大佛寺 紅拂墓 觀音岩 懷杜厓 青龍岩 慕巖臺

石門山 十洲 石魚屏 雲陽山 十房洞 桃山洞 彩山岩 吐秀岩 桃

花洞 白水洞 紫極宮 兩壁岩 金城山 雷劈嶺 穿岩 羅洪岩 龍宮厓

牌樓石 普和寺 崔婆井 紫荆臺 仙梅亭 乾明寺 道岩山 幕阜山

道人磯 西湖 魚梁亭 雲母泉 李羣玉故里 車公山

二 衡陽

冲退醉石 合江亭 祝融峰 芙蓉峯 天柱峯 擲鉢峯 安上峯 獅子岩

中華名勝古蹟 第十三編 目錄

水簾洞 絡絲潭 南岳廟 方廣寺 銅柱 侯公岩 天寶石柱 古炎帝陵

西山 小石城山 翠玉山 澹岩 四仙岩 小邱 鈷鋤潭 黃溪 小石潭

袁家渴 南池 萬石亭 三亭 雷洞 高山 九龍岩 月岩 中郎岩 石魚

湖 九嶷山 玉瑄岩 紫虛洞 虞舜陵 層岩 同岩 媵岩 陽華岩 劍泉

觀音岩 羊角山 兜率岩 仰龜龍潭 艮岩 貞女峽 金雞洞 焦源岩

垣明岩 神女岩 秀岩

三

辰沅

..... 四〇—五〇

羅山 明山 岩坡 靈岩山 倒水岩 高靈洞 蒙泉 燕子岩 龍門洞 天

門山 檳榔洞 將軍洞 黃蠟洞 憑虛樓 普安寺 馬希範銅柱 風雷洞

玉田洞 楠木洞 赤寶山 沙子坪 西晃山 林祿洞 雨珠洞 蓮柱 觀音

洞 馬王城 插劍泉 太虛洞

中華名勝古蹟續編

第十三編 湖南

一 湘江

昭山

昭山在長沙縣南六十里。接湘潭縣界。以周昭王至此故名。截江而起。仄立萬仞。怪石磅礴。異木層陰。微露岩罅。舟過其下。隱隱見石窗岩牖。窺攀莫及。洵異境也。山側有譜煥之墓。下有昭潭。深不見底。湘水最深之處。或謂昭王南征不返。沒於此。故潭以爲名云。

栖霞谷

栖霞谷在長沙縣西。述異志。昔有橋順二子。於此得仙。服飛龍一丸。十年不饑。魏文帝詩曰。「西山有仙童。不飲亦不食。」卽此。

金牛岡

金牛岡在長沙西十里。湘中記。漢武時有田父牽朱牛求渡。漁人曰。船小豈能勝牛。曰。但相容不重。於是登舟。半渡。牛糞於船。曰。以此相贈。漁人怒其污。以撓撥棄水。將盡。方覺是金。訝其異而躡之。見人牛俱入嶺。掘之不得。因名金牛岡。唐裴休鎮長沙。嘗讀書於此。舊有裴休書堂。

道鄉臺

道鄉臺在嶽麓山上。舊嶽麓寺旁。宋鄒浩號道鄉。謫衡過潭。爲州守溫益所逐。山僧留宿於此。後張栻築臺以表之。朱子刻石曰道鄉。因以名臺。又以朱子嘗改嶽麓山頂曰赫曦。亦名赫曦臺。

仙壇嶺

仙壇嶺在湘陰縣南三十里。其峯青秀。一名青山。上有霞峯臺。湖鼻巖。及龍潭諸勝。頗堪遊觀。

洞陽山

洞陽山在瀏陽縣西北六十里。以山洞向南而名。周廻一百十里。相傳孫思邈煉丹於此。上有潭湫。水流入洞中半里許。石竇引光。沙石朗然。內有龍跡。道書以爲第二十四洞天。

王仙山

王仙山在醴陵縣三十里。一名大山。又名王喬山。山有三石室。曰三獅洞。內有石牀。石臼。石卓。石棋之屬。宏敞如堂。頂上石色皆白。間有作藍色者。乘炬而進。有清溪不可渡。中多魚蝦。山上舊有登春觀。唐開元間建。玄宗賜書六大字。宋太宗嘗取入京閱覽。已而還之。並賜書飛白字。後觀遭回祿。玄宗書被燬。獨飛白書僅存。道士彭知一乃建御書閣。歐陽修爲作記。

章仙山

章仙山在醴陵縣北五十五里。一名章龍山。道書以爲七十二福地之一。相傳

臧真人得道處。後訛臧爲章。層巒疊嶺。山勢雄秀。多亭臺寺觀。景物殊佳。前人題咏至夥。

醴泉

醴泉在醴陵縣北三里。名勝志。縣北有陵。陵上有井。涌泉如醴。因以名縣。今邑人建坊於其地。醴泉浸月。爲縣八景之一。

三刀石

三刀石在醴陵縣東二里。相傳許遜自洪都來醴。斬蛟除患。曾試劍於石者三。今痕跡宛然。劍石含霜。亦爲縣八景之一。

近思書院

近思書院在醴陵縣治東院內。舊祀朱晦庵、呂東萊。清乾隆時重修。知縣事許凝道題額曰近思。蓋昔時朱呂曾講學於此。又嘗同編近思錄也。今則專祀朱而不及呂。門額亦改矣。其左有博文約禮齋舊址。中有朱子石像。

大佛寺

大佛寺在醴陵長田衝獅子山。內有飛來鐘一具。寺後有七星池。清冽不竭。相傳寺僧雪庵禪師嘗於山獲七雉。已而化爲龍。穿池中七孔而去。故名七星。

紅拂墓

紅拂墓在醴陵縣西二里西山上。山一名靖興。相傳唐李靖南平嶺桂。駐兵於此。紅拂隨行。搆疾而卒。因葬是山。當時曾建靖興寺。居僧以守護之。今山有李衛公祠。

觀音巖

觀音岩在湘潭縣北六十里空靈灘北。湘水上游。巉石峭出。勢如張蓋。有大洞。廣二十餘尺。高六七尺。深六七尺。巖右鳥道縈紆。護以石闌。春秋佳日。憑眺於此。寒溜鳴玉。溼翠欲流。波光山色。風物至佳。巖左有杜公亭。崖壁刻

有唐杜甫空靈岸詩。

懷杜厓

懷杜厓在湘潭縣北鑿石浦。杜甫有宿鑿石浦詩。宋米黻於其地題刻曰懷杜厓。

青龍岩

青龍岩在寧鄉縣西大瀉山北。萬山壁立。溯深澗而入。攀援石磴。始至其巔。俯瞰神龍潭。深暗不測。岩中幽花怪石。殊堪遊觀。

慕巖臺

慕巖臺在寧鄉縣東南九十里。宋隱士謝楚華慕巖子陵高風。因鑄慕巖臺三字於石。

石門山

石門山在益陽縣西一百里。上有九疊泉。從山西下。有棧木洞。仄徑穿入。幽

深絕異。非復人間境界。

十洲

十洲曰劉公千家黃花清水華林文星烟波龜茗羅溪孟家也。在益陽縣東南二里資水中。布列江心。宛若河圖之數。水漲時分畫尤著。

石魚屏

石魚屏在湘鄉縣西十里。亦曰石魚山。其北有飯籬山。水經注。漣水在石魚山下。多元石。石色黑而理若雲母。開發一里。輒有魚形。鱗鰭首尾。宛若刻畫。長數寸。燒之作魚膏腥。因以名之。

雲陽山

雲陽山在茶陵縣西。山周七十里。從平地至嶺。曲折四十五里。有偃霞紫薇石柱白蓮隱形正陽石耳等七峯。上有百靈關真仙洞玉華洞赤松壇。般若岩諸勝。嶂巒青翠。岩岫幽深。景物至堪觀覽。

十房洞

十房洞在安化縣北十五里。寬坦若廳事。自廳入穴。中有竅。俗呼天窗。左右列十房。各有門。有鐘鼓。擊之能作聲。後有石田石池之類。洞府之佳境也。

桃山洞

桃山洞在安化縣北一百三十里。洞中有千丈坑和尚石。注水池、風洞、雷洞、龍洞。又有石床石枕等。景物幽奇。

彩山岩

彩山岩在寶慶縣東三十里。一名石鼓書洞。洞口宏敞。其中寬平。有石書、石鼓、石牀、石几。旁有圓孔。偃僂而入。後有一洞。幽邃杳窈。莫測其終。

吐秀巖

吐秀巖在寶慶縣北五里。巖石陡峻。俯瞰洞穴。深窈不可測。昔人鑿石爲棧道。題吐秀岩三字。其下有石如鹿形。

桃花洞

桃花洞在寶慶縣南七里官道左。洞扉高丈餘。石室宏敞。頂有一竇通明。中有石牀石竈。右有石磴。盤旋可出。峯頂洞前多桃樹。花落水中。從山後小溪中流出。紅英點水。景物宜人。

白水洞

白水洞在寶慶縣北四十里。兩山對峙如門。旁有一小洞。望之幽邃。近復明爽。有溪從山峽出。泝流而入半里許。大山環列如壁。泉水洞下爲唐溪。入於茱萸灘。境地清幽。若非塵寰。

紫極宮

紫極宮舊在寶慶縣西。宋端平中建。女仙道圓羽化處。道圓楊氏女。有道術。郡守子兩手拳合。醫不能療。道圓以果食卽開。後自寫遺像留詩於宮。尸解去。僅存隻履。埋葬於縣北開元觀左。

兩壁岩

兩壁岩在武岡縣北九十里。澗水出洞口。兩山峭削。爲小橋以通行人。中開石洞。無徑可躋。從後石竇而入。舊有龍王閣。下有深潭。舟過其處。望之如島。

金城山

金城山在新寧縣南十五里。道書以爲第六十八福地。鳥道縈迴。度三天門。直至其巔。可二十里。岩洞高敞。石菴幽夔。有泉二。鍊丹池一。上有七里橋。又有一石橫互絕頂。有石棋盤。平如砥石。碁子八。石凳二。旁有古樹。屋曲上如偃蓋。有一石竇。名曰鈴子。舊構乾坤一覽亭於其上。

雷劈嶺

雷劈嶺在新寧縣東南五十里。接東安縣界。奇峯崢嶸。阻絕行人。明時忽雷劈成衢。可通商賈。石壁有庚申二字。筆力遒勁。不知何人所作。

穿岩

穿岩在新寧縣東一百里。兩岩相對。東曰天岩。外築石城。由小竇登岩上。一洞如樓窗然。西曰地岩。深入土窟。石坡廣數十丈。相隔二里。中通一溪。澗其間。深不可涉。

羅洪岩

羅洪岩在新寧縣北三十里。洞門高迥。水從岩底流出。中一小竇。拳曲可入。內如樓閣三層。可容數十人。其源幽邃。莫能窮也。

龍宮厓

龍宮厓在新寧縣東九十里。由江口溯流而登。達象王峯。石磴嶽嶽。約二十里許。得騎虎石。上有層樓疊閣。一泉從空中瀑下如簾。飛殊散霧。景色最佳。

牌樓石

牌樓石在新寧縣東十五里。大白村江澗。石壁高數丈。五色相兼。如牌樓然。中有門廣數丈。

普和寺

普和寺在城步縣城南。山門一柱。木屑合成。無斧斤迹。上覆鐵瓦。留墨斗。曲尺於中。盛夏無蛛絲。相傳爲宋代物。門外又有二石鼓。光明若鏡。下臨巫水。

崔婆井

崔婆井在常德縣西三十里平山下。宋時仙客張虛白嘗館於酒姥崔氏。氏嘗飲以醇酒。經年不責償。詢姥以所欲。姥以江水遠。不便汲爲言。張指舍傍隙地爲井。掘不數尺。得泉甘冽。人爭市焉。名曰崔婆井。

紫荊臺

紫荊臺在岳陽縣南澗湖上。一名紫溪臺。岳陽風土記。紫溪臺亦名紫荊臺。在澗湖上。下有石高四丈。曰紫溪石。岳陽紀勝。昔有江叟者。遇樵夫遺以鐵笛。吹之無聲。一日登白鶴山。吹於紫荊臺。響振林谷。忽有二女子出授神藥。曰服此當爲水仙。女子蓋龍女也。

仙梅亭

仙梅亭在岳陽縣西南岳陽樓側。明崇禎間岳陽樓毀。土人於湖濱沙磧中得石一方。石上枯梅一幹。別無枝葉。共二十四尊。皆自成文理。不假人爲。因構亭覆之。

乾明寺

乾明寺在岳陽縣南。五代時建。一名乾元寺。亦曰新開寺。岳陽風土記。乾明寺舊永慶寺也。內有古柏。相傳是大禹手植。岳陽古蹟志。乾元寺基。晉參軍蔡勳捨園宅爲之。後唐灝鑑道人爲道場。是山及宋太平興國間。賜藏經及旃檀像一軀。今唯藏經存焉。內有灝鑑道人塔銘。

道岩山

道岩山在平江縣東九十重。一名香爐山。巖岫幽聳。風景頗佳。上有七星石。龍影洞。艾仙壇。龍湫。丹竈諸勝。

幕阜山

幕阜山在平江縣東。爲岳郡鎮山。一名昌江山。道書以爲第二十五洞天。石崖峭立。飛鳥莫息。壁有篆文。夏禹治水嘗至此。有巨石曰繫舟峯。又有丹井。藥臼諸遺跡。相傳葛仙翁艾仙君嘗居山煉丹。絕頂有石田。勝渠隱然。非人力所能爲。但地極高險。上登不易。山產藥材甚夥。又多異草怪木。人不盡識。

道人磯

道人磯在臨湘縣西南十五里江濱。一名微落山。亦名落暉磯。有石高聳峙起。如道人北面而立。形勢極佳。

西湖

西湖在臨湘縣西北一里。碧波激盪。湖水漣漪。中植荷蕖。每屆夏時。則翠蓋翻風。紅英照日。風物之佳。一時無兩。

魚梁亭

魚梁亭舊在臨湘縣南一里魚梁山下。舊時旁多垂柳。水盡蒹葭。每當新晴雨霽時。漁歌款乃。牧笛村煙。爲一邑之勝遊。

雲母泉

雲母泉在華容縣東南墨山下。唐李華雲母泉詩序云。元石山南有佛寺。倚山巔。嶺下有雲母泉。出石罅。發源如乳。潼末派如醇漿。大浸不盈。大旱不耗。自墨山西北至石門。東南至廣陵。廣輪二十里。盡生雲母。牆階道路。炯炯如列星。然井泉溪澗。色皆純白。鄉人多壽考。

李羣玉故里

李羣玉故里在澧縣東一里仙眠洲。羣玉字文山。唐澧洲人。文采藻麗。長於詩賦。不樂仕進。裴休愛其才。觀察湖南。厚延致之。及爲相。薦之。曰。羣玉放懷邱壑。吟咏性情。吐妍詞於麗則。動清律於風騷。冥鴻不歸。羽翰自逸。霧豹遠迹。文采愈奇。詔授宏文閣校書郎。所著有詩集行於世。

車公山

車公山在安鄉縣西北四十里。相傳車武子遊憩於此。後人嘗建亭於山。曰車公亭以表之。武子名胤。晉南平（卽安鄉）人。父育爲郡主簿。武子幼勤學。家貧不常得油。夏月則練囊盛螢以照讀書。及長以博學知名於世。每有盛會必邀參與。不然皆云無車公不樂。官至吏部尙書。

二 衡陽

冲退醉石

冲退醉石在衡陽縣北水簾洞前石浪中。刻有冲退醉石四大字。不知何人手筆。又有試心石在縣西北會仙橋青玉壇下。突出聳起。下臨萬仞。形勢怪異。

合江亭

合江亭在衡陽縣烝湘二水合流處。唐韓愈詩云「紅亭枕湘江。蒸水會其

左瞰臨眇空濶。綠淨不可唾。維昔經營初。邦君實王佐。翦林遷神祠。買地費家貨。梁棟宏可愛。紹構麗匪過。伊人去軒騰。茲宇遂頽挫。老郎來何暮。高唱久乃和。樹蘭盈九畹。栽竹盈萬箇。長綆汲滄浪。幽蹊下坎坷。波濤夜俯聽。雲樹朝對臥。初爲遺宦情。屯乃最郡課。人生誠無幾。事往悲豈奈。蕭條綿歲時。契濶繼庸懦。勝事誰復論。醜事日已播。中丞黜兇邪。天子閔窮餓。君侯至之初。閭里自相賀。淹滯樂閑曠。勤苦勸慵惰。爲余拂塵堦。命樂醉衆座。窮秋感平分。新月憐半破。願書岩上石。勿使泥塵涴。」

祝融峯

祝融峯在衡山縣西北三十里。高三百十五丈。乃衡山七十二峯之最高者。上多濃雲。往往咫尺不見人。忽隱忽見。變幻無窮。有上封寺。卽舊光天觀。隋大業中始易爲寺。寺瓦皆鐵。防爲風吹也。寺東有觀日臺。有碑題曰觀日出處。相近有舍利塔。寺西有望月臺。峯巔又有聖帝廟。疊石爲之。廟之南有同

源碑焉。

芙蓉峯

芙蓉峯在衡山縣西北十里。祝融峯之東。古稱容峯。上有講經臺。水經注。衡山容峯最爲竦桀。自遠望之。蒼蒼隱天。故羅含云。望若陣雲。非晴不見。

天柱峯

天柱峯在衡山縣西北十五里。祝融峯之西。亦名雙柱峯。形如雙柱聳拔。西北有香岡。產香白芷。

擲鉢峯

擲鉢峯在衡山。距嶽廟十七里。相傳陳時思大和尚擲鉢於此。故名。下有隱身岩。卓錫泉。舊又有船石。其狀如船。人經其下。造講經臺。因呼爲飛來船。清順治七年。兵備副使彭而述過之。因題其上曰。此物飛來。會當飛去。次年忽失此石所在。時人傳爲異焉。

安上峯

安上峯在衡山嶽廟西。有舜祠、舜洞、舜溪等。世傳虞舜南巡時駐此。林壑潛深。境地幽靜。衡山之最清秀處也。

獅子岩

獅子岩在衡山軫宿峯西。巨石儼然。狀肖狻猊。成昂首蹲踞勢。岩前刻有天然大師四字。下有泉曰獅子泉。泉旁更有一穴焉。

水簾洞

水簾洞在衡山紫蓋峯側。距嶽廟東北八里許。飛泉歛濺。折疊而下。形如珠簾。響振林壑。對之塵襟爽然。前面有雪浪亭。翼然聳峙。而洞則在山之高處。

絡絲潭

絡絲潭在衡山駕鶴青岑二峯間。嶽廟後。水源自芙蓉香爐諸峯而來。潭水從高下瀉。如曳匹練。衝坳擊石。聲動林谷。而洪大曲折。過於水簾。

南岳廟

南岳廟在衡山縣西北三十里。大門內爲櫺星門。再進爲正南門。重簷二層。更進爲嘉應門。爲大殿。大殿後爲寢宮。翼房數十間。黃瓦重簷。柱用巨石。外圍朱垣。古木繁茂。志云。廟坐壬向丙。前後直深百二十五丈。左右橫廣分兩截。後截五十七丈八尺。前截四十六丈三尺。大殿重簷七間。內外柱準七十二峯之數。規制崇闕。蓋可想見。歷代祭岳。都在於此。

方廣寺

方廣寺在衡山蓮花峯下。距嶽廟六十里。寺居其中。其地泉石清幽。叢林秀寂。風物之佳。衡山所不易得者。宋朱晦庵張南軒嘗遊於此。寺旁因有二賢祠。距寺二三里。有石澗潭寺。其前森林叢密。陰翳不見陽影。下臨絕澗。水聲潺湲。境地之佳勝。殆又過於方廣焉。

銅柱

銅柱在衡山縣西北。名勝志。吳黃武二年都督程普與蜀關公分界。共立銅柱爲誓。卽此。

侯公岩

侯公岩在耒陽縣西三十里。宋仁宗嘉祐中道人穿石竅得之。一夕雷雨。竅大開。明見四壁。第二岩有石乳滴成獅子狀。高五尺。因名獅子岩。後以有侯彭老者隱此。乃曰侯公岩。

天寶石柱

天寶在耒陽縣西五十里。高五六尺。上有字多磨滅。可識者惟天寶十一年五字耳。

古炎帝陵

古炎帝陵在酃縣西二十里。林木茂盛。蒼蒼青翠。宋太祖乾德五年始訪得。開寶四年詔置守陵七戶。清時亦嘗迭此遣官致祭。

西山

西山在零陵縣西。唐柳宗元有始得西山宴遊記。文曰：「自余爲僇人居是州。恒惴惴。其隙也。則施施而行。漫漫而游。日與其徒上高山。入深林。窮迴溪。幽泉怪石。無遠不到。到披草而坐。傾壺而醉。醉更相枕以臥。意有所極。夢亦同趣。覺而起。起而歸。以爲凡是州之山有異態者。皆我有也。而未始知西山之怪特。今年九月二十八日。因坐法華寺。望西山。遂命僕過湘江。緣染溪。斫榛莽。焚茅筏。窮山之高而止。攀援而登。箕踞而遨。則凡數州之土壤。皆在衽席之下。其高下之勢。呀然洼然。若垤若穴。尺寸千里。攢蹙累積。莫得遯隱。縈青繚白。外與天際。四望如一。然後知是山之特出。不與培塿爲類。悠悠乎與灑氣俱。而莫得其涯。洋洋乎與造物者游。而不知其所窮。引觴滿酌。頽然就醉。不知日之入。蒼然暮色。自遠而至。至無所見。而猶不欲歸。心凝形釋。與萬化冥合。然後知吾嚮之未始游。游於是乎始。故爲之文以志。是歲元和四

年也。」

小石城山

小石城山在零陵縣西。柳宗元有小石城山記。文曰：「自西山道口徑北。踰黃茅嶺而下。有二道。其一西出。尋之無所得。其一少北而東。不過四十丈。土斷而川分。有積石橫當其垠。其上爲睥睨梁欂之形。其旁出堡陽。窺之正黑。投以小石。洞然有水聲。其響之激越。良久乃已。環之可上。望甚遠。無土壤而生嘉樹美箭。益奇而堅。其疏數偃仰。類智者所施設也。」

羣玉山

羣玉山在零陵縣西南。山石皆白。故名。有岩曰德星。洞曰修竹。幽篁清修。古木樛曲。怪石萬狀。爲一郡之奇觀。

澹巖

澹巖在零陵縣南二十五里。盤伏在兩江之間。周里許。有巖竇可容萬夫。昔

有澹姓者居此。因名。舊有澹山寺。樓殿屋室。隱隙罅中。雖風雨不能及。或云澹巖。宋黃庭堅始題識之。洞中有石。載山谷詩與書。去澹巖三里有暗岩。秉燭而入。其中廣袤。亦可容萬人。

四仙巖

四仙巖在零陵縣西南。由梅溪西行四十里。突起一峯。半壁皆石。嵌空玲瓏。下有二潭。一潭澄靜。一潭瀑布直下。潭北爲洞。洞中有石井。水甘冽可飲。傍有石門。上至懸厓間爲石樓。几案榻欂。皆天然石物。

小邱

小邱在零陵縣西。鉗鉞潭西。柳宗元文曰。一得西山後八日。尋山口西北道二百步。又得鉗鉞潭。西二十五步。當湍而峻者爲魚梁。梁之上有邱焉。生竹樹。其石之突怒偃蹇。負土而出。爭爲奇狀者。殆不可數。其嶽然相累而下者。若牛馬之飲於溪。其衝然角力而上者。若熊羆之登於山。邱之小不能一畝。

可以籠而有之。問其主曰：唐氏之棄地，貸而不售，問其價曰：止四百。余憐而售之。李深源元克已時同遊，皆大喜，出自意外。卽更取器用，剷刈穢草，伐去惡木，烈火而焚之。嘉木立，美竹露，奇石顯。由其中以望，則山之高，雲之浮，溪之流，鳥獸魚之遨遊，舉熙熙然，迴巧獻技，以效茲邱之下。枕席而臥，則清冷之狀與目謀，潏潏之聲與耳謀，悠然而虛者與神謀，淵然而靜者與心謀。不匝旬而得異地者二，雖古好事之士，或未能至焉。」

鉅錫潭

鉅錫潭在零陵縣西三里。中有小泉，經愚溪入瀟水。柳宗元文曰：「鉅錫潭在西山西，其始蓋冉水，自南奔注，抵山石，屈折東流，其顛委勢峻，湯擊益暴，齧其涯，故旁廣而中深，畢至石乃止，流沫成輪，然後徐行，其清而平者且十畝，有樹環焉，有泉懸焉，其上有居者，以予之亟游也。一旦款門來告曰：不勝官租私券之委積，旣芟山而更居，願以潭上田買財以緩禍，予樂而如其言。」

則崇其臺。延其檻。行其泉。於高者墜之。潭有聲濼然。尤與中秋觀月爲宜。於以見天之高地之迴。孰使予樂居夷而忘故土者。非茲潭也歟。」

黃溪

黃溪在零陵縣東七十里。柳宗元文曰：「……黃溪距州治七十里。由東屯南行六百步。至黃神祠。祠之上。兩山牆立。如丹碧之華葉。駢植。與山升降。其缺者爲厓。峭巖窟水之中。皆小石平布。黃神之上。揭水八十步。至初潭。最奇麗。殆不可狀。其略若剖大甕。側立千尺。溪水卽焉。黛蓄膏滯。來若白虹。沈沈無聲。有魚數百尾。方來會石下。南去又行百步。至第二潭。石皆巍然。臨峻流。若頰頰斷齧。其下大石離列。可坐飲食。有鳥赤眉烏翼。大如鵠。方東嚮立。自是又南數里。地皆一狀。樹益壯。石益瘦。水鳴皆鏘然。又南一里。至大冥之川。山舒水緩。有土田……」

小石潭

小石潭在零陵縣西小邱之西。柳宗元文曰：「從小邱西行百二十步。隔篁竹。聞水聲如鳴佩環。心樂之。伐竹取道。下見小潭。水尤清冽。全石以爲底。近岸。卷石底以出。爲坻爲嶼。爲嵒爲巖。青樹翠蔓。蒙絡搖綴。參差披拂。潭中魚可百許頭。皆若空遊無所依。日光下徹。影布石上。怡然不動。俶爾遠逝。往來翕忽。似與遊者相樂。潭西南面望。斗折蛇行。明滅可見。其岸勢犬牙差互。不可知其源。坐潭上。四面竹樹環合。寂寥無人。淒神寒骨。悄愴幽邃。以其境過清。不可久居。乃記之而去。同遊者吳武陵、龔古、余弟宗玄。隸而從者崔氏二小生。曰怒己、曰奉壹。」

袁家渴

袁家渴在零陵縣南。柳宗元文曰：「由冉溪西南水行十里。山水之可取者五。莫若鉅澗。由溪口而西陸行可取者八九。莫若西山。由朝陽巖東南水行至蕪江。可取者三。莫若袁家渴。皆永中幽麗奇處也。楚越之間方言。謂水

之反流者爲渴。音若衣褐之褐。渴上與南館高嶂合。下與百家瀨合。其中重洲小溪。澄潭淺渚。間厠曲折。平者深黑。峻者沸白。舟行若窮。忽又無際。有小山出水中。山皆美石。上生青叢。冬夏常蔚然。其旁多巖洞。其下多白礫。其樹多楓栝石楠榿檣樟。草則蘭芷。又有異卉。類合歡而蔓生。鞦韆水石。每風自四山而下。拔動大木。掩苒衆草。紛紅駭綠。蕪勃香氣。衝濤旋瀨。退貯谿谷。搖颺葳蕤。與時推移。其大都如此。余無以窮其狀。永之人未嘗遊焉。余得之不敢專也。出而傳於世。其地世主袁氏。故以名焉。一渴相近。又有石渠石澗之勝。柳宗元亦有文曰。一自渴西南行不能百步。得石渠。民橋其上。有泉幽幽然。其鳴乍大乍細。渠之廣或咫尺。或倍尺。其長可十許步。其流抵大石。伏出其下。踰石而往。有石泓。昌蒲披之。青鮮環周。又折西行。旁陷巖石。下北墜小潭。潭幅減百尺。清深多儻魚。又北曲行紆徐。睨若無窮。然卒入于渴。其側皆詭石怪木。奇卉美箭。可列坐而庥焉。聲搖其巔。韻動厓谷。視之既靜。其聽

始遠。予從州牧得之。攬去翳朽。決疏土石。旣崇而焚。旣醜而盈。惜其未始有傳焉者。故累記其所屬遺之其人。書之其陽。俾後好事者求之。得以易。元和七年正月八日。蠲渠至大石。十月十九日踰石得石泓小潭。渠之美。於是始窮也。一又曰。一石渠之事旣窮。上由橋西北下。土山之陰。民又橋焉。其水之大。倍石渠三之。巨石爲底。達於兩涯。若牀若堂。若陳筵席。若限閭輿。水平布其上。流若織文。響若操琴。揭跣而往。折竹掃陳葉。排腐木。可羅胡牀十八九居之。交絡之流。觸激之音。皆在牀下。翠羽之木。龍鱗之石。均蔭其上。古之人其有樂乎此耶。後之來者。有能追予之踐履耶。得意之日。與石渠同。由渴而來者。先石渠。後石澗。由百家瀨上而來者。先石澗。後石渠。澗之可窮者。皆出石城村東南。其間可樂者數焉。其上深山幽林。逾峭險。道狹不可窮也。」

南池

南池在零陵縣東南。唐柳宗元有陪永州崔使君遊讌南池序。有曰零陵城

南環以羣山。延以林麓。其厓谷之委會。則泓然爲池。灣池爲溪。其上多楓楠。竹箭哀鳴之禽。其下多芡芰蒲渠。騰波之魚。韜涵太虛。澹灩里閭。誠遊觀之佳麗者也。名勝志地當南山之缺。設自神功。無容工鑿。隨山周旋。可容巨艦。

萬石亭

萬石亭在零陵縣北萬石山上。柳宗元有文曰。「御史中丞清和男崔公來蒞永州。間日登城北牖。臨於荒野藂翳之隙。見怪石特出。度其下必有殊勝。步自西門。以求其墟。伐竹披輿。欵仄以入。綿谷跨谿。皆大石林立。渙若奔雲。錯若置碁。怒者虎鬥。企者鳥厲。抉其穴。則鼻口相呀。搜其根。則蹄股交峙。環行卒愕。疑若搏噬。於是剗闢朽壤。煎焚榛蕨。決滄溝。導伏流。散爲疏林。洄爲清池。寥廓泓渟。若造物者。始判清濁。效奇於茲地。非人力也。乃立游亭。以宅厥中。直亭之西。石若掖分。可以眺望。其上青壁斗絕。沈於淵源。莫究其極。自下而望。卽合乎攢巒。與山無窮。」

三亭

三亭在零陵縣東山之麓。一曰讀書林亭。二曰湘秀亭。三曰俯清亭。唐零陵令薛存義建。柳宗元有記。

雷洞

雷洞在祁陽縣西七里。厓高數十丈。洞容數百人。南有石門。又南數十步。石厓通竅。泉出其下。曰雷澤洞。舊建道觀於上。曰雷壇。

高山

高山在東安縣西北一里。五峯突出。石上有宋人題刻。有幽巖。自外達內。凡九門。門隔一洞。極深遠可觀。

九龍岩

九龍巖在東安縣北一百里。山形陡起。奇石錯立。巖前有池。巖門高敞。循磴而下。隙僅可容身。其中方廣闐靜。頓別塵境。

月岩

月岩在道縣西營山西南二里。一名太極岩。東去濂溪十五里。岩形如圓廡。中可容數萬斛。東西有兩門。望之如城闕。而虛其頂。自東望之如月上弦。自西望之如月下弦。就中望之如月之望。故名月岩。向以其東西相通。亦名穿岩。

中郎岩

中郎岩在道縣西北四十里。一名進賢岩。石洞幽邃。內有泉從石罅出。泠泠不竭。石厓層磴。若躡削所成。沿磴而上。如升樓閣。境地奇詭。

石魚湖

石魚湖在道縣東濂泉南。有獨石在水中。狀如遊魚。唐元結嘗遊憩於此。作文賦詩。詩有「吾愛石魚湖。石魚在湖裏。魚背有酒樽。繞魚是湖水」之句。又有醉歌曰。「石魚湖似洞庭。夏水欲滿君山青。山爲樽。水爲沼。酒徒歷歷

坐洲島。長風連日作大浪。不能廢人運酒舫。我特長瓢坐巴邱。酌飲四座以散愁。」

九疑山

九疑山在寧遠縣南六十里。亦名蒼梧山。郡國志。九疑山有九峯。一曰朱明。二曰石城。三曰石樓。其形如樓。四曰娥皇。下有舜池。池旁春日百鳥生卵。人取之則迷路。卵不可得。五曰舜源。比衆峯最高。其上多紫蘭。六曰女英。七曰簫韶。峯下卽象耕種之處。八曰桂林。馬明生遇安期授金液神丹之處。九曰梓林。周義山開石函得經讀之升仙之處。又有九水。七流嶺北。二則翻注廣南。水經注。九疑山盤蒼梧之野。峯秀數郡之間。羅峯九舉。各導一溪。岫壑負岨。異嶺同勢。遊者疑焉。故曰九疑。元結九疑圖記。九疑山方二千餘里。四州各近一隅。世稱九峯相似。望而疑之。謂之九疑。亦云舜登九峯。疑禹而悲。從臣有作九悲之歌。因謂之九疑。九峯極高大。遠望皆可見也。彼如嵩華之

峻峙。衡岱之方廣。在九峯之下。磊磊然如布碁石。可以百數。中峯之下。水無魚鼈。林無鳥獸。如蟬蠅之類。聽之亦無。往往見大谷長川。平田深淵。松杉百圍。榕栝並之。青莎白沙。洞穴丹厓。寒泉飛流。異竹雜花。回映之處。似藏人家。山故多修隱之士。潛確類書云。簫韶峯東北有三麓牀。乃古高道之士所作。第一麓牀。有石長一尺六寸。人跡髣髴。第二麓牀。有二石鑑。寒光清圓。第三麓牀。有巨石在路旁。又有修真四壇。第一壇有茜草長丈餘。如虎鬚。古人鍊丹。鐺釜尙存。第二壇有清池東流。有齊永明所鑄鐵磬十二枚。第三壇有石牀。筌竹。圍大者幾二尺。第四壇有石盆。水出不竭云。

玉瑄巖

玉瑄巖在寧遠縣東南。巖下有洞。元結名曰無爲洞。篆刻存焉。洞在舊永福寺東十步。上有至元間李嶠篆刻。行五里有南北二徑。一徑通舜峯。一徑通紫虛洞。行二十里。有石穴。有元結永泰年題名。

紫虛洞

紫虛洞在寧遠縣東南。本曰斜巖。唐刺史薛伯高所命名。紫虛洞乃宋至道初太守張觀所更。明嘉靖中又改曰重華洞。亦曰紫霞巖。巖有石田。綦布。巖竇可二丈。執炬而入。見峻崖峭壁。寒泉冷風。滴乳如佛像。如車蓋。如花果。如器皿。如飛走。有石室。可坐百人。其東有洞。中又有風洞雷洞焉。

虜舜陵

虞舜陵在寧遠縣九嶷山女英峯下。一名零陵。亦名永陵。自古禁樵采。置守陵戶。歷代遺官致祭。舊有祠在山南。前有石碑。文字缺落。不可辨識。明洪武遷於簫韶峰下。

層巖

層巖在永明縣西南三里。層山之陰。洞穴空廣。高數十丈。廣數百步。有澗自巖中出。橫紆如帶。

同巖

同巖在永明縣北三里。水石之奇與層巖同。故名。洞口石門。有泉自厓湧。澄泓數畝。從門流出。中空廣可容千人。有明有晦。晦者需炬而行。此巖中虛外固。前堂後寢。內外有辨。邑人常保聚於此。

姹巖

姹巖在江華縣西十里。巉巖奇巧。中有石柱如蓮花。俗名蓮花巖。景物怪異。堪資游覽。

陽華巖

陽華巖在江華縣東南。唐元結銘云。九疑萬峯。不如陽華。陽華巉巖。其下可家。洞開爲巖。巖當陽端。巖高氣清。洞聲泉寒。陽華旋回。嶺巔如闕。溝塍松竹。輝映水石。讀此蓋可知巖之佳勝焉。

劍泉

劍泉在郴縣西。泉從石罅間出。世傳英布卓劍處。因成泉。宋張舜民嘗刻銘於上。

觀音巖

觀音巖在永興縣西五里。壁立瞰江。巖下有如石象。江心有石如獅。稱邑之奇觀。

羊角山

羊角山在資興縣北六里。山脊稍凹。有石門。從石門入。幽溪盤紆。林木蒼鬱。側瞰危石。蒼翠欲滴。景物絕佳。上有平田數畝。山麓又有石洞一穴。

兜率巖

兜率巖在資興縣南二十里。一名靈巖。有泉水湧出。纍纍如楊梅然。因又名楊梅堂。巖內空闊迂迴。秉燭入遊。有石觀音羅漢像。又有石幢、石鐘、石鼓等。巖前有金箭灘。

仰竈龍潭

仰竈龍潭在資興縣東十里。幽溪深箐。澄潭千尺。旁有天然石橋。高數十丈。勢極峻危。

艮巖

艮巖在宜章縣南二里。有水自巖湧出。其深莫測。舊嘗鑄大士渡海像於中。爲一邑之勝境。

貞女峽

貞女峽在汝城縣南。水經注。匯水出桂陽（即汝城）南至四會溪水。下流歷峽南出。是峽謂之貞女峽。峽西岸高巖。名貞女山。山下際有石如人形。高七尺。狀如女子。故名貞女峽。古來相傳。有數女取螺於此。遇風雨晝晦。忽化爲石。唐韓愈有貞女峽詩。曰。一江盤峽束春湍。豪雷風戰鬥魚龍。逃懸流轟轟射水府。一瀉百里翻雲濤。漂船擺石萬瓦裂。咫尺性命輕鴻毛。」

金雞洞

金雞洞在桂東縣東北十五里。一名龍巖石。一名仙人掌。洞中石壁上隱隱有仙人掌。跡下有金雞石。相傳昔有金雞現於石上。

焦源巖

焦源巖在桂陽縣南三十里。高敞如堂。中有佛龕丈室。巧逾人工。旁一石。頂背如僧狀。名面壁石。

坦明巖

坦明巖在桂陽縣北六十里。週塘。巖下有洞。深廣可容百十人。一溪潌洄。有天生石橋跨之。昔人嘗建庵其上。其石乳如雲磬狀。扣之聲清而有韻。

神女巖

神女巖在桂陽縣北。勢甚軒敞。周市前後如堂。下有石柱。高可丈許。大數圍。隻手撼之。往往似動。衆力擠之。屹立如定。

秀巖

秀巖在臨武縣南十五里。巖石天成。門奧俱備。中平曠可坐數百人。四壁璀璨如五彩。壁上鐫采芾書秀巖二字。巖東北有穴通明。石乳結聚。下有兩穴。水出其左。爲大溪流。二百餘步。復入石穴。相近又有紅石巖。中可容百人。石乳結成花木鳥獸之狀。

三 辰沅

羅山

羅山在芷江縣西三十里。一名巖羅坡。岫壁嶙峋。峯巒特異。石壁下流泉三道。匯而成井。岩刻靈派流芳四字。迤東有洞曰岩羅洞。穴豁舒淙淙曲水。達爲溪流。凡二里東流四十里會楊溪。入漣水。

明山

明山在芷江縣北二十里。郡之鎮山也。岡巒重複。朝把郡治。飛雲濃黛。如列

畫屏。東爲五土坡。舊傳唐五高士結廬於此。稍西爲百子峯。峯西爲黎溪。膏液所凝。厥產色石。頂舊有假武殿。爲郡人報賽之所。

巖坡

巖坡在芷江縣東七十里。山勢橫互如蔓虺。石質堅韌。研之成粉。可以墜壁。上有風洞。稍下爲林家洞。有石室。巖半曰巖坡。洞皆有泉。滙於上趾。爲洞水溪。

靈岩山

靈巖山在桃源縣北七十里。蘇溪村。山有五洞相連。洞中有小河并龍潭。水清可鑒。石壁上有天然大士像。昔人評桃源勝景。首推靈岩。

倒水巖

倒水巖在桃源縣西南六十里。欽山之東。甕子灘上。龍家溪自北出流其下。其上有十二峯。列馬石。溪左巖石參差。鼎立稱尊。適可三足。中皆有澗隔之。

其地饒竹。幽篁便娟。至可玩賞。

高靈洞

高靈洞在桃源縣一百五十里。三面皆白。俯仰五十尺。橫廣有加。洞右有小門。僅二尺許。初入沈黑。燃炬入數十折。得若堂若房者數間。朗然有光。後有長灘四五折。爲十曲巖。又數步爲仙界坡。坡右有瓊田十二。溝塍儼然。洞中風景幽秀可觀。又十里通赤霞洞。相傳人不能至云。

蒙泉

蒙泉在石門縣西花山下。有宋黃魯直書蒙泉二字。五雷諸山至此。忽然開朗。兩水瀠流。山川窈窕。爲石門最勝處。

燕子巖

燕子巖在慈利縣東南二里。亦名燕子洞。宋端平間有人題額燕子岩三字。岩內深廣可容數千人。岩後有石穴。秉炬而入。中有明處。四圍石乳融結成

種種形。有石如燕子狀。

龍門洞

龍門洞在慈利縣九溪城東。修長如徑。旁多坎坷。如蜂房蟻穴。入洞一里許。具幽妙之致。有石獅蹲踞。因又名獅洞。後以旁近鯉魚灘。改名龍門。

天門山

天門山在大庸縣南三十里。卽古松梁山。一名嵩梁山。有十六峯。最高者爲天門。空朗透徹。明貫山頂。其上有泉。宇文周建德中。祀爲南岳。又有天漕堰。白練千仞。懸流而下。每夏旱。山麓之田利賴焉。山經注。高聳孤聳。素壁千尋。望之若亭。又似香爐。吳永安六年。其山洞開如門。高三百丈。廣二百丈。孫休以爲嘉祥。分武陵置天門郡。

檳榔洞

檳榔洞在大庸縣西。接永順縣界。從穴而入。有大門。鐫石像。十里許。四山壁

立無路徑。中有小溪。自東南來。入石竅中。伏流復出。爲大溪。景最幽勝。

將軍洞

將軍洞在大庸縣東南。門廣一丈。高數丈。有石柱倒懸。遊人秉炬而入。中有石田。區畫井然。有水伏流。出洞外。名白馬泉。春時往往有魚鱗。頗肥美。

黃蠟洞

黃蠟洞在鳳凰縣南七里。洞高三丈。深四里許。內有溪流可釣。相傳釣者不語。即得魚。皆黑色。否則一魚不獲。

憑虛樓

憑虛樓舊在沅陵縣西二里。明王守仁謫龍場。過此寓焉。庭中有古松一株。因榜其旁曰松雲軒。

普安寺

普安寺舊在沅陵縣治東。元大德中。妙鑠和尚建。三年乃成。妙鑠來自沅州。

有度世禁氣之術。寺功始畢。乃著袈裟。躡芒屨。遶寺行三日。人莫測其故。投寺前井中。其徒宗寶急率衆往井覓之。不可得。後怡溪人報妙鑠尸在清浪灘。往視之。果然。解其袈裟。得一頌曰。三十三年。無道無禪。空空盡在水底生蓮。乃歸葬之。越數月。有人見其在巴東。行走如飛。追之不及而止。

馬希範銅柱

沅陵縣西北一百十里會溪城對江。有五代時馬希範置銅柱。宋史太平興國七年。詔辰州不得移馬氏銅柱。卽此。胡三省通鑑注。在會溪城西南一里。演繁露。柱高丈二尺。入地六尺。以銅五千斤爲之。

風雷洞

風雷洞在瀘溪縣西。懸厓千仞。二洞並立。左風右雷。更有一洞。介乎其間。水泉翻浪而出。俗傳天每欲雨。則風雷發於二洞。故云。

玉田洞

玉田洞在瀘溪洞東十五里。洞中幽邃冥妙。左畔石板上如田狀者千餘。俗呼爲千坵田。

楠木洞

楠木洞在溆浦縣西二十里。盧峯山西。石壁峭立。梯竹以登。有水曰龍池。其深莫測。洞門舊多楠木。羅蔽中深。五里許有楠木泉。下流爲無盡溪。

赤寶山

赤寶山在黔陽縣南里許。沅水瀘水合流於此。本名七寶山。山勢插空。日出霞映如錦。中有二十四勝。最著者峯曰白雲、香藤、蘿月、嵐峯、迴峯、觀瀾、芙蓉。待月、先月、乳峯、翠雲。小山曰螺山。谷曰盤谷。坪曰翠雲。澗曰琴澗。嶺曰楓香。亭曰翠微。又有梅花逕。梅花隴。花時如雪。遊人集焉。

沙子坪

沙子坪在黔陽縣北七十里。亦曰涵虛洞。一名飛雲洞。在山中。漸進高廣如

現。屋。其地浮沙軟滑。因名沙子坪。躡磴上通。見頂穴如屋。罅隙光所照。鬚眉畢

西晃山

西晃山在麻陽縣南三十里。出丹砂。自麓至頂。可二十里。中有一澗。橫斷之。互以石梁。曰仙人橋。長五丈。頂上有洞。曰雷公洞。聲殷殷出其間。過者怖之。半山有洞。曰三鬚洞。曰饒鉞洞。曰沈家洞。洞水歎薄。匯爲溪流。曰石橋溪。

林祿洞

林祿洞在麻陽縣西十五里。俗名乾洞。明時士人避兵藏書於此。亦名亞西洞。上有宋大觀二年題名四十六字。

雨珠洞

雨珠洞在麻陽縣北二十里。俗名巖洞。高百丈。深如之。有四門。其中最著奇蹟。有石鐘、仙田、石屋、仙池、石屏、石佛、石龍、石馬、石筍、石水晶、石鐘乳、石佛手。

石城石柱等洞。後一門。宛如中雷。

蓮柱

麻陽縣西三十里有天擎洞。崇厓嶮嶂。石湍飛溜。有石柱高數百尺。上鏤齒蒼曰蓮柱。偉觀。

觀音洞

觀音洞在桑植縣南三里。洞有三重。透迤而入。澄潭石髓。幽勝莫可名狀。歷第三潭數里許。通縣城東門。聞城中男女雞犬聲。

馬王城

馬王城在靖縣西北十里飛山上。一名馬王坪。五代馬氏兵討飛仙洞蠻。會潘全盛遣其黨楊承磊畧武岡。馬氏遣呂師周討之。援蘿躡石。直抵飛山。分軍布柵。全盛大駭。承來戰。師周破其軍。縛降者爲鄉導。襲擒全盛。斬之。盡平東穴。今環飛山濠塹遺址尙存。

插劍泉

插劍泉在會同縣西一百步。舊有隱真觀。相傳呂洞賓曾到觀。見道童苦汲。以劍插此。泉水涌出。明成化九年。縣令劉永嘗建亭。並立碑其上。呂劍留泉。爲縣八景之一。

太虛祠

太虛祠在乾城縣東三里。深里許。洞口如螺。中有八仙臺。可敷數席。上懸石乳。下有溪流。可以垂釣。



中華名勝古蹟續編目錄

第十四編 四川

一 西川

公園 駟馬橋 石經 青羊宮 昭覺寺 五代蜀王建墓 薛濤井 萬里橋
張飛墓 東岩 尙友閣 桂湖 王漁墓 苟居士寫經臺 東湖 仙人井 青
城山 天師洞 白雲溪 長生宮 上清宮 普照寺 離堆 繩橋 玉佛 瀑
布泉 超然亭 誓水柱 石罄山 金雁橋 月波井 文昌勝境 盤陀仙境
佛爺岩 九子龍窩

一一一四

二 東川

塗山 洪厓洞 長安洞 佛圖關 聖廟古碑 羅漢寺 丹岩 松石 葛仙山
金佛山 四十八渡 九遠山 建文帝幽潛處 鐵櫃山 龍多山 西山 下

一四一三

岩 雷洞 鳳山 二仙山 瀟溪洞 虹飲岩 丙穴 鳴玉溪 望夫臺 月岩

三 建昌……………一二一—三〇

蒙山 總崗山 大佛岩 避瘴山 瀘沽峽 白岩 石岩洞 四峰山 九頂山

高標山 方響洞 龍門山 魏了翁讀書處 千佛岩 大石佛 石倉米洞

范鎮讀書臺 火井 霧山 趙雲墓

四 永寧……………三〇—三六

思峨洞 天倉山 仙侶山 五子池 武侯征蠻故道 竹岩洞 西湖 龍橋

虞公峽 玉壺井 雙洞 金鵝洞 安樂山 偶住亭 古佛洞 資州四岩 佛

岩山 虞允文墓 雷番山

五 嘉陵……………三六一—四八

盤龍山 文城山 將相堂 房瑄墓 北津樓 畫卦石 大蓬山 孔雀洞 佛

龍洞 避塵山 雲臺山 思依山 靈雲洞 天台山 龍門山 富水洞 藥臺

得漢山 十二峰 壁園 霄漢閣 牛頭山 劉蛻瘠文處 天柱山 韭菜岩

中華名勝古蹟 第十四編 目錄

三

中華名勝古蹟 第十四編 目錄

□

中華名勝古蹟續編

第十四編 四川

一 西川

公園

公園在成都少城內。綠樹青蒼。紅花綽約。構亭設座。引水成池。並有茶肆操場等。地雖不廣。殊堪遊憩。附近又有展覽會、辛亥爭路紀念碑等。亦足觀賞。

駟馬橋

駟馬橋在成都縣北。本石昇仙橋。漢司馬相如初入長安。題曰。非高車駟馬。不過汝下。後人因易今名。

石經

石經在成都舊府學。孟蜀時相母昭裔刻孝經、論語、爾雅、周易、尚書、周禮、毛

詩禮記儀禮左傳凡十經。盡依太和舊本。歷八年乃成。後宋田元均又補刻公穀。晁公武補刻古文尙書。胡元質嘗爲作堂以貯之。曰石經堂。

青羊宮

青羊宮在成都縣西南。一名青羊觀。亦曰青羊肆。寰宇記老子與關尹堯別約曰。千日後尋我於成都青羊肆。卽此。其地林木翳蔚。樓觀壯偉。內有三清殿。玉皇樓。古銅羊。古鼎等。外則清水一灣。有望仙橋。迎仙橋等。境地幽靜。風光清佳。允足繫遊人之跡。停客路之驂也。

昭覺寺

昭覺寺在成都縣北。宋建。卽孟蜀宣華苑故址。清時重修。地多林木。亭亭矗立。濃陰蔽日。景物幽勝。炎夏道暑。允爲佳地。

五代蜀王建墓

五代蜀王建墓在成都大西門外。頗爲高廣。有二石幢。

薛濤井

薛濤井在華陽縣錦江南岸百花潭上。有碑刻曰薛濤井。唐薛濤嘗家於此。舊名玉女津。明蜀王每歲春三月三日。汲此水造牋二十四幅。以十六幅入貢。附近有望江樓。風景絕佳。

萬里橋

萬里橋在華陽縣南。蜀使費禕聘吳。諸葛亮祖之。歎曰：萬里之行。始於今日。因以名橋。唐明皇幸蜀過此。問橋名。左右有對。明皇歎曰：開元末僧一行謂。更二十年朕當遠遊萬里外。此其驗也。寰宇記亦名篤泉橋。以橋南有篤泉也。

張飛墓

張飛墓在萬里橋南。墓道多竹木。地絕幽寂。相近有桓侯祠。境亦幽靜。又橋側有關公墓。乃昭烈帝以衣冠招魂葬此。

東巖

東巖在簡陽縣東五里。巖後有石洞二。洞有龍泉。左右刻八卦圖及隸書西銘。又有西巖在縣西五里。南巖在縣南三里。北巖在縣北二里。皆堪遊玩。

尙友閣

尙友閣舊在崇慶縣治西湖上。宋紹興間計敏夫領郡事。以高適爲此州時。與杜甫詩詞酬唱。乃索高杜二詩刻石。目其閣曰尙友。

桂湖

桂湖在新都縣南。本名衛湖。明楊慎歸田後植桂樹百枝。因易今名。今樹猶多。存在湖廣可十畝。中多荷花。每值夏令。碧紅映日。風景絕勝。且其地有樓閣亭榭。卽平時遊憩於是。亦足開懷豁目也。請曾國藩嘗飲於湖上。有桂湖詩五首。詩前綴以小序曰。新都桂湖。明楊升庵修撰故宅也。使旋過此。縣令張君宜亭招飲湖上。爲賦此詩。詩云。一遂別華陽國。歸程始此賒。翻然名境

訪來及夕陽斜。翠竹偃寒蝶。丹楓噪暮鴉。詞人云異代。臨水一咨嗟。——短城三面繞。淺水半篙寒。鳥過穿殘日。魚行起寸瀾。秋來樓閣靜。幽處地天寬。平昔江湖性。眞思老釣竿。——十里荷花海。我來吁已遲。小橋通野港。壞艇臥西陂。曲岸能藏鷺。盤渦尙戲龜。傾城遊女盛。好是采蓮時。——矮桂枝鈎。蕩叢篁葉打頭。隄行皆仄徑。路斷得高樓。欄檻千迴錦。玻璃五色秋。落霞沈水底。綺散不能收。——頗憶家山好。去鄉茲六年。此間行樂地。小有洞庭天。點綴須人力。招尋信妙緣。使君殊不俗。把酒意茫然。」

王渙墓

王渙墓在新都縣北十五里。舊有二石闕。各高三丈。一題曰漢故兗州刺史。雒陽令王君稚子之闕。一曰漢故侍御史河內縣令王君稚子之闕。兩角有斗。又作重屋。四壁刻人物馬牛之類。

苟居士寫經臺

苟居士寫經臺在新繁縣北三十里。隋時有苟居士嘗於臺上寫經。雨降獨不濡溼。人以爲異。臺側有石硯。

東湖

東湖在新繁縣。中植荷花。夏景絕佳。又有假山亭榭之屬。儘堪遊憩。清同治時重修。立有石碑。又有柏樹三株。勢若虬龍。相傳係唐李德裕手植。蓋其地爲衛國公故址云。

仙人井

仙人井在金堂縣東北十五里。仙人李八百女弟妙應真人於此取水煉丹故名。

青城山

青城山在灌縣西北三十里。杜光庭青城山記。岷山連峯接岫。千里不絕。青城乃第一峯也。前號青城。後曰大面。其實一耳。有七十二小洞。應七十二候。

八大洞。應八節。仙經。此是第五洞天。上有流泉懸澗。一日三時灑落。謂之潮泉。玉匱經。此五大洞。寶仙九室之天。黃帝封爲五岳丈人。刻五篆書。猶存。輿地紀勝。大面山在三溪之北。前臨成都山。衆峯攢聚。高七十二里。又八大洞。一太一。二九仙寶室。三沙羅。四高臺玉室。五麻姑。六寶園。七聖母。八都督。方輿勝覽。諸峯屹然。三十有六。前十八謂之陽峯。後十八謂之陰峯。今峯巒洞壑。雖若如舊。而按籍訪求。不能盡合。前代隱逸方士。如古甯封。李阿。李珣。趙昱。孫思邈等之古蹟。仙蹤亦多湮沒。惟林木青葱。雲煙變幻。鳴泉鼓響。瀑布練飛。風物之佳。舍娥眉外。無與京匹。蠟屐往遊者。時有其人。

天師洞

天師洞在青城山。張道陵修煉於此。故有天師洞之名。巖壑高崇。叢林陰翳。境地清涼。風景尤佳。夏時常有人來此避暑。洞前有澗。澗上有橋。洞之前後多道觀。有三皇殿。靈祖殿。天師殿等。又有唐明皇碑石。張道陵降魔石。及漢

代櫻樹。銀杏各一株。咸有蒼老之致。

白雲溪

白雲溪在天師洞附近。厓刻有白雲溪三字。乃五代杜光庭隱處。卽於此注廣成儀。宋郫人張愈亦嘗居是。文彥博治蜀。爲置白雲谿居於此。

長生宮

長生宮在灌縣西南二十里。一名長生觀。亦曰范賢觀。蜀漢昭烈時有范寂字無爲。修煉於此。有長生久視之術。昭烈帝徵之不起。封爲逍遙公。名其宅曰長生觀。晉李雄入蜀。欲迎爲君。力辭。乃封爲天地太師。西山侯。號曰賢。故又名其處曰范賢觀。今殿宇三重。頗形壯偉。道士居焉。有清黃雲鶴等碑記。

上清宮

上清宮在灌縣高台山。晉建。吳船錄。宮在峯頂。岷山數百峰。悉在闌檻下。如翠浪起伏。勢皆東傾。今宮內除殿宇迴廊外。有李西漚書木刻亳州老子廟。

碑及黃雲鵠譚石門詩石刻宮外遠眺風物至佳門有聯曰「境至上清半點紅塵飛不到壇開無垢滿天花雨散來香」宮附近岩上有黃雲鵠青城第一峯五字摩厓字絕大五代趙宋時地爲遊觀勝境今則歲月悠久古跡荒蕪而堪遊者止此亦可慨矣。

普照寺

普照寺在青城山上唐建清時重修石柱飛檐極宏大壯偉之致殿可容千人寺右有雪山寺兩寺相距雖近而路中山光樹翠幽閒闐靜遊跡至此油然而興清曠之思。

離堆

離堆在灌縣西南漢書溝洫志蜀守李冰鑿離堆避沫水之害宋史河渠志離堆之址舊鑿石爲水則則盈一尺至十而止水及六則流始足用過則從侍郎堰減水河泄而歸於江歲作侍郎堰必以竹爲繩自北引而南準水則

第四。以爲高下之度。元史河渠志。北江少東爲虎頭山。爲鬥雞臺。臺有水。則以尺畫之。凡十有一。水及其九。則民喜。過則憂。沒其則則困。又書深淘灘。低作堰。六字。其旁爲治水之法。皆冰所爲也。又東爲離堆。今觀冰當日鑿石處。江口甚狹。號曰寶餅口。口旁有二石碑。泐尺寸。土人指示所謂水則也。至深淘灘。低作堰。六字。則鐫在石厓上。土人至今遵奉之。離堆前有伏龍觀。祀冰及其子二郎。相近又有二王廟。亦祀冰父子。倚山臨江。規模宏壯。風物亦佳。

繩橋

繩橋在灌縣。有二。一新一舊。新者在東門外。舊者在西門外。其構造之法。以巨竹。綆紐結二方。上敷木板。於以度人。兩橋各長里餘。新者落成未久。庀工鳩材。五年而成。是處江流湍急。橋下水勢洶湧。激擊衝射。驚濤層瀾。極可觀覽。然膽怯者。往往不敢逼視。

玉佛

玉佛在彭縣北門外龍興寺。高二尺餘。雕鏤極精。眉目宛然。色質瑩淨。傳爲緬甸所製。又寺藏有銅鳳頭一具。銅鏡一面。乃寺外破塔上舊物。今塔巍然。猶在高數十尺。

瀑布泉

瀑布泉在平武縣南一百七十里。其泉自層巒疊嶂。飛流千尺。爲龍陽十景之一。

超然亭

超然亭舊在江油縣北竇圖山。乃竇真人古蹟。明萬歷間。推官朱仲廉建。清康熙時。邑人楊廷傑重修。有碑記。

誓水柱

誓水柱在北川縣西四十五里河岸。柱高丈許。圍五尺。相傳昔人恐水衝縣。立此誓之。

石磬山

石磬山在彰明縣北。李膺記：西有石室，方一丈三尺，下有流泉，味甘。內有懸磬，聲聞數里。四面石牀高一丈。

金雁橋

金雁橋在羅江縣。卽蜀漢諸葛亮兵擒張任處。橋計九孔，有石刻曰古金雁橋字。

月波井

月波井在錦竹縣治東一里。漢嚴君平鑿。每朝霞霽，月井中波紋盪漾，掩映交輝。

文昌勝境

文昌勝境在梓潼縣北七曲山。山以路盤曲七折，故名。寰宇記：郡國志云：張惡子昔至長安，見姚萇謂曰：却後九年，君當入蜀。若至梓潼七曲山，幸見尋。

至建元十二年。葛隨楊安南伐。未至七曲山。迷道游騎。忽見一鹿。逐至廟門。鹿自死。追騎共剝之。有頃。葛至。悟曰。此是張君爲吾設主客之禮。烹食而去。卽此。今山有石坊曰。七曲山九曲水文昌勝境。過坊上東山。有文昌宮。顏曰。帝鄉。入內殿。宇神像。莊嚴宏壯。後有一洞曰。第一洞天。相傳爲帝君誕生地。更上有家慶堂。天尊殿焉。按寰宇記。神姓張。名惡子。晉人。戰死。唐廣德二年。僖宗幸蜀。神見於利川桔柏津。封爲廣濟王。視幸其廟。解劍贈之。明統志按。圖志云。神姓張。諱亞子。其先越嶺人。因母報仇。徙居是山。自秦以來。世著靈異。宋建炎以來。累封神文聖武孝德忠仁王。明史。神姓張。名亞子。居蜀七曲山。仕晉。戰沒。人爲立廟。道家謂帝命梓潼掌文昌府事。及人間祿籍。故元加號爲帝君。而天下學校。亦有祠祀者。據此。則神之姓氏。生世。大概可知。惟輿地紀勝。則云神姓張。名育。於苻秦陷蜀時戰死。此不但與諸書之名諱不同。卽時代亦與前書殊別。而圖志又與寰宇記。明史殊別焉。

盤陀仙境

盤陀仙境亦在七曲山。過石坊上西山。有石高十餘尺。曰盤陀石。更上有屋三楹。曰應夢臺。內有石牀。堂右有一枯柏。高可二十尺。相傳此晉代物也。

佛爺巖

佛爺岩亦在七曲山。有一石屋。梁柱垣壁。莫非是石。中有如來佛石像。高可五尺。壁間又有小石佛百餘尊。此石佛石屋。不知何代好事者之所作爲。至于今日。而令後人臨覽撫摩也。

九子龍窩

九子龍窩在理番縣西。一名筆架山。亦曰玉山。相傳夜靜恆有霞光橫山前。東北半壁。天皆丹色。照林木如畫。至旦方滅。

一一 東川

塗山

塗山在巴縣東一里。山厓泐有塗山二字。字方數丈。山麓又刻有字水二字。山上有禹廟。顏曰塗山古剎。又有老君洞。風景最佳。又有禹娶塗山啓呱呱泣處碑。其他碑記詩刻亦頗夥。全山峯巒峻秀。下臨江水。亦巴縣遊覽勝地也。清王士禎嘗登臨其上。有絕頂眺望詩曰：「飛瀑落長虹。登臨見禹功。山圍巴子國。苔沒夏王宮。峒俗烏巒近。畬耕白帝同。渝州天塹地。感慨大江東。」

洪厓洞

洪厓洞在巴縣西二里。一名滴水岩。蒼厓翠壁。中懸巨石。其下嵌空。上有瀑布瀉出岩前。舊有吏隱亭及輕紅亭。

長安洞

長安洞在巴縣西八十里。深二里。入者必秉燭乃可進。盡處有石墩二。狀若龍。過此則積水泓深。不可復往矣。

佛圖關

佛圖關在巴縣西十里。即蜀漢李嚴欲鑿通汶涪二江處。爲重慶要津。上有石佛像。故名。東門外石壁有明代詩刻。及清同治時姚觀元篆書關銘等。

聖廟古碑

巴縣聖廟內有姚觀元刊北宋拓本石鼓文。邵陽褚千峯縮寫石鼓圖碑。及蘇軾洋州詩。松醪賦。橘頌碑。另又有同治時重刻明劉綬詩石刻。在大成門右廊。

羅漢寺

羅漢寺在巴縣城內。中多石佛。有藏經閣。又有明吳皋楊慎諸人詩石刻。惜破斷剝落。不可卒讀。深可惜耳。

丹巖

丹巖在長壽縣西北一里。高二十丈。相傳馬宋徐神翁煉丹處。有瀑布下注。

於江。又有集仙山。爲神翁飛升處。

松石

永川縣西南六十里來蘇鎮松石坪。舊產松石。石質而松理。或二三尺許。大可合抱。俗呼爲雷燒松。杜詩所謂萬年松化石。卽此。

葛仙山

葛仙山在榮昌縣東。層巒疊嶂。形勢雄峻。以葛仙翁名。舊有煉丹岩、洗藥池、甘露茶、打子石諸跡。相近有桃香嶺。舊有桃樹根出石上。無寸土。相傳仙翁遺核於此而生。

金佛山

金佛山在南川縣。峯巒清秀。泉瀑湍流。林木青蒼。景物幽靜。盛寺觀又多。石洞有古佛、石牛、觀音、燕子、黃蜂諸名。皆幽冥深邃。景色萬千。而古佛最勝。

四十八渡

四十八渡在南川縣東。兩山壁立。一水灣環。頗饒天然之致。而第六渡之千佛崖。二十四渡之老龍洞。尤爲遊賞勝地。

九遠山

九遠山在南川縣東。絕壁如銀色。人恒視其質之昏明。以候晴雨。上有水瀦爲洞。高廣百尺。左右石臺。有兩泉。溫冷非常。池上各蟠石龍。初非鐫刻。洞以龍名。見輿地紀勝。

建文帝幽潛處

璧山縣南七十里。山形似盤。長十里。橫八里。結爲大坪。秀峯羅列。四面朝拱。相傳明建文帝幽潛於此。

鐵櫃山

鐵櫃山在涪陵縣北五里。屹立如櫃。相傳武侯嘗屯兵山上。馬提幹詩：「石魚占歲稔。鐵櫃鎖晴天。」卽此。其南二里爲北巖山。宋紹聖間程灝削籍竄

涪州曾居此注易。

龍多山

龍多山在合川縣西北。與蓮溪縣接界。輿地紀勝。晉時廣漢人馮蓋羅煉丹於龍多山之仙臺。永嘉三年舉家十七人仙去。唐孫樵有龍多山錄。山東有大池。卽武后時放生池。有東岩廣五十丈。多唐人刻字。泉自岩出。瀦爲方池。大旱不竭。其山高明窈深。變態萬狀。有駕鶴軒。下視涪水如帶。煙雲出沒。山之偉觀也。

西山

西山在萬縣西三里。一名太白岩。其初泉荒草蕪。宋郡守馬元穎魯有開元翰相繼修西山池亭。爲峽山絕勝。又有絕塵龕在石壁間。有唐人題記。見輿地紀勝。

下巖

下岩在萬縣東二里。與古練石岩並擅幽勝。唐末有劉道徵者。嘗構屋居此。宋黃庭堅詩。一空岩靜發鐘磬響。古木倒掛藤蘿昏。一卽咏此。

雷洞

雷洞在開縣東五里。一名龍洞。一名仙女洞。亦曰東洞。唐貞元九年雷雨震開。洞口有石室。石龕。佛像等。又有西洞在縣西北五十里。亦曰龍馬洞。

鳳山

鳳山在巫溪縣東一里。亦曰東山。木石蒼翠。景物幽絕。上有觀音巖。巖中有月窟。雲岩諸勝。

二仙山

二仙山在巫溪縣東北十七里。上下皆峭壁。惟一徑。寬二尺。長四五丈許。步履其間。遊者不敢下視。有二仙洞。一名五子洞。洞極幽邃。洞前有池。

瀘溪洞

瀘溪洞在達縣東南。有溪水自洞中出。行溪中亂石間里許。始至洞口。炬而入。極深遠。垂乳纓絡其上。珠聯玉綴。成爲佳觀。

虹飲巖

虹飲巖在渠縣西。巖上有滴水。下有石臼。大如盃。盃盛之。日出時有虹飲映巖下。故名。舊時嘗構亭其上。名虹飲亭。

丙穴

丙虹在萬源縣東北。方輿紀覽。其穴凡十。產嘉魚。春社之前魚出穴。秋社歸。其出也止於巴縣龍脊灘。首有黑點。點應星象相感而生。長身細鱗。肉如白玉。其味自鹹。蓋食鹽泉也。

鳴玉溪

鳴玉溪在忠縣西。一名西溪。寰宇記。上有懸巖瀑布。高五十餘丈。潭洞幽邃。古木蒼然。前刺史房式嘉其幽絕。特置蘭若。凡置五橋。以渡溪水。今廢。

望夫臺

望夫臺在忠縣南十里。宋蘇軾詩云「山頭孤石遠亭亭。江轉船回石如屏。可憐千古長如昨。船去船來自不停。浩浩長江赴滄海。紛紛過客似浮萍。誰能坐待山月出。照見寒影高伶俜。」

月巖

月巖在彭水縣西壺頭山。巨石也。宋冉永震作月岩銘。有句云中竇一穴。透明而圓。皎如秋月。翳絕雲烟。旁輔三隙。如星之聯。

三 建昌

蒙山

蒙山在雅安縣。連名山蘆山二縣界。書禹貢。蔡蒙旅平。即此。元和志。山在嚴道（即雅安）縣南十里。每歲貢茶。爲蜀之最。茶譜。山有五嶺。有茶園。中頂曰上青峯。所謂蒙頂茶也。按蒙頂茶至今爲茶中貴品。前清亦采以入貢。產

於山之蓮花峯。其他各嶺所產者似不及焉。俗傳蒙頂茶種。係後漢時僧自西域携來。此說殊無稽不可信。

總崗山

總崗山在名山縣南四十里。東西綿亙數百里。西連雅安。東抵蒲山。南則嘉眉。又有迴龍山。峭壁奇峯。瀑布似飛龍。炎夏山色如秋。爲縣人避暑之所。

大佛巖

大佛巖在名山縣南。巍峨聳秀。峙立空青。唐咸通中魯公輸遊觀。有聖燈夜現。鐫像岩石。亦曰看燈山。

避瘴山

避瘴山在漢源縣南九十里。近大渡河。止側有二洞。一空濶高燥。一有水出。名曰乾溼洞。其中床坐竈突之類。厓石自成。不假人爲。每秋夏嵐瘴動時。飛鳶羣集其中。至立冬前後。瘴已乃出。土人每以鳶爲候。相隨移居此山避之。

瀘沽峽

瀘沽峽在西昌縣北一百里。南北長五里。兩山壁立。峽深百餘丈。濶不盈尋。縣水流其中。琮琤有聲。中有觀音巖。

白巖

白岩在天全縣南一里。高山雄峻。白石矗立如雪。亦名雪山。

石岩洞

石岩洞在越嶲縣北。中可容數十人。東北厓畔有石版。扣之有聲。名瓊鐘。

四峯山

四峯山在樂山縣東十里。山如連珠者四。極高。其第三峯之腰有洞。外石筍三。高數丈。洞下有清泉。歲旱不涸。有默齊居士者。嘗隱此以自樂焉。

九頂山

九頂山在樂山縣東。方輿勝覽有九峰。曰集鳳、栖鸞、靈寶、就日、丹霞、祝融、擁

翠望雲兌說。下有凌雲寺。唐開元中僧海通於瀆江沫水濛水三江之會。悍流怒浪之濱。鑿山爲彌勒大像。高三百三十尺。建七層閣以覆之。至韋皋時積十五年而工始備。

高幪山

高幪山在樂山城內。一名高望。郡之主山也。巍然高峙。萬象在前。清王士禛嘗遊其上。有登高望山絕頂望峨眉三江歌曰。一四海復四海。九洲還九洲。河伯海若更相笑。螭蛄何足知春秋。今年辭帝蓬萊宮。乘風偶作西南遊。中條姑射不作數。失喜太華揚高旒。河潼遠坵巨靈跖。鉤梯百丈臨龍湫。終南太白幻雲物。秦棧詰屈哀猿愁。錦城小住五十日。岷山秀色垂簾鉤。青城玉壘尻首接。灌口屈注雙江流。興極欲蹋大峨眉。卻騎瘦馬來龍游。樂山周曰。平羌隋開皇三年改曰龍游。九年更曰青衣。嘉州罨畫枕江上。孤峯縹緲東南浮。神霄玉清有遺跡。登臨可以消煩憂。蹋泥盤盤到絕頂。江山披豁

開雙眸。峯巒八面簇金碧。下瞰江海如浮漚。八十四盤在衣帶。氣凌五岳驕公侯。暮雲早雪互明滅。兜羅綿現無時休。岷江從東來。奔騰迴萬牛。沫水滙青衣。簸蕩千斛舟。三江九峯倏然合。丹厓翠嶂窮雕鏤。江山奇麗冠天下。何意絕景來蠻陬。天風蓬勃日西墜。搔首欲去仍淹留。荆吳萬里自茲始。來朝起柁尋巴丘。」

方響洞

方響洞在樂山縣舊府學東百步許。水從洞出。螿爲大井。聲若環珮。鏘然有韻。舊名丁東水。宋黃庭堅改今名。有詩云：「古人題作丁東水。自古丁東直到今。我爲更名方響洞。信知山水有清音。」清王士禛嘗入嘉州。訪得之作詩云：「廿年夢想丁東院。何意丁東院裏來。山水清音空復在。劫灰殘燒自生哀。井欄僧汲稀銅鉢。石甃秋深長綠苔。不遇江南老桑苧。風爐誰遣試茶杯。」（自注放翁丁東院詩我是江南老桑苧諸君小住共茶杯）

龍門山

龍門山在峨眉縣西十里。兩崖峭壁。仰觀青天。僅露一線。上有洞。可容百人。對山瀑布飛泉。直下數十丈。瀦爲深潭。宋范成大嘗遊此。以爲天下峽泉第一。

魏了翁讀書處

夾江縣西二里雲吟山。宋魏了翁讀書其上。有隸書雲吟山三大字石刻。

千佛岩

千佛岩在夾江縣西五里。數峯嶮然。岩石峭拔。而唐人以鑄佛像甚衆。因以爲名。西岩瀑布懸流。響振林壑。其下潭中有龍腦石。又有象鼻岩在縣北五里。與龍腦石相映玲瓏危聳。而插入江濱也。

大石佛

大石佛在榮縣南一里大佛山。高四十七丈。濶十五丈。架殿宇十層。雄壯宏

偉。洵異觀也。北麓有真如厓。有龍洞。深廣容數百人。

石倉米洞

石倉米洞在彭山縣東北二十五里。有石倉在半山石壁間。岩竇如蜂房。相傳竇中嘗出米。謂之石倉米洞。

范鎮讀書臺

范鎮讀書臺在彭山縣盤石山。上有石刻鎮詩。一窮幽訪盤石。細徑入荒涼。踏葉屢履溼。觸花衣袂香。又縣東北象耳山有李白讀書臺。上有石刻白書。

火井

火井在邛崃縣西南。左思蜀都賦。火井沈熒於清泉。高焰飛燭於天垂。卽此博物志。火井縱廣五尺。深二三丈。在臨邛（卽邛崃）縣百里。昔人以竹木投取火。諸葛丞相往視之。後火轉盛。入以家火卽滅。訖今不復然也。華陽國

志火并夜時光映上昭。民欲其火。先以家火投之。頃許如雷聲。火焰出通燿數十里。以竹筒盛其火。藏之。可拽行終日不滅。

霧山

霧山在大邑縣西十里。一名霧中山。山多雲霧。故名。上有七十二峯。碧玉潭。明月池諸勝。去山二十里有鶴鳴山。形如覆甕。上有二十四洞。應二十四氣。七十二穴。應七十二候。東西二溪。出其兩腋。東南有石峯。名曰天柱。三面懸絕。其形如城。亦名曰天城。又有牡丹池。青霞嶂。環玉潭。皆擅佳勝。明楊慎碑記云。鶴鳴二十四洞。道家之所開。霧山一百八盤。釋氏之所駐。今鶴鳴爲蒼莽之墟。而霧山擅莊嚴之美。

趙雲墓

趙雲墓在大邑縣東三里。雲字子龍。蜀漢真定人。昭烈帝爲曹操所追。棄妻子南走。時雲爲騎將。保護皆得免難。累遷翊軍將軍。封永昌亭侯。五虎將雲

居其一。號虎威將軍。先主嘗曰：子龍一身都是膽。年八十餘卒於蜀。

四 永寧

思峨洞

思峨洞在瀘縣西南。初入稍隘。已乃洪大。石髓凝結。千態萬狀。前望宛若堂亭。舊傳爲故思峨州地。因名。

天倉山

天倉山在宜賓縣西二里。上有前代屯兵墩臺遺跡。崖壁間有唐乾封二年。睿居秀修復古戎州道記。其北有天倉灘。相近大江。

仙侶山

仙侶山在宜賓縣西北二里。峯巒清秀。竹林森翠。山腰有清泉。又有石洞四。其一曰楊仙洞。相傳爲宋楊道人昇仙之地。

五子池

五子池在宜賓縣西三里。廣數十丈。中峙五石。羅列頗勻。遊人每携酒臨池。以爲樂。四旁產五色石。明潤堪供玩賞。

武侯征蠻故道

慶符縣北八十里漢陽山。蜀漢諸葛亮南征。嘗駐軍於此。厓壁上鐫武侯征蠻故道六字。

竹巖洞

竹岩洞在富順縣東南五十里。有流杯池。宋侍郎鄭瑩嘗居此。著有前後竹岩賦。

西湖

西湖在富順縣西。方廣二頃。水潔魚美。菱芡蒲荷。統滿其中。遠山送翠。近水搖光。亭榭如洲。艇船似葉。湖中打槳。座上品茶。爲邑之勝地。遊人集焉。輿地紀勝。西湖有洞窈窕。昔有入洞者。見二女櫛髮於竇間。遺以名鏡。其人致富。

百倍卽此。

龍橋

南溪縣東二里龍騰山下瞰大江。其北有石橫空長四尺。俗呼爲龍橋。山半有洞深四丈。相傳李八百所鑿。鐫曰李公洞。八分體。字畫勁遒可觀。

虞公峽

虞公峽在長寧縣東十五里武寧溪上。昔有巨石橫絕中流。宋嘉定間故相虞允文子杭孫爲守。鑿之以通舟楫。石上大鐫虞公峽三字。

玉壺井

玉壺井在筠連縣。水絕清冽。其地層樓聳峙。古木扶疏。風景之佳。亦堪遊賞。

雙洞

雙洞在珙縣南廢都寧驛東三里。二洞相通。舊時蠻人所居。明總兵劉顯郭成平蠻旋師過此。洞頂石上鐫天兵紀績四大字。

金鵝洞

金鵝洞在隆昌縣西一里許。孤山峭壁。有溪水東來。遶城曲折。環山之趾。下爲懸厓。壁立千尺。飛流如練。稱爲奇勝。俗傳有藏金鵝其中。或以銅鵝換之。故又名換鵝洞。

安樂山

安樂山在合江縣西。唐天寶六年勅改合江山。傳卽隋開皇時劉珍藏丹經鐘磬之處。方輿勝覽。三峯奇秀。有溪及延真觀。有石櫃爲仙人藏經之所。岐而左。有爛柯跡。後有仙魚影。在石壁中。岐而右。歷木楠臺。仙人屋。十二盤。至剪刀峽。循山有八洞。通南岩。有石曰許由瓢。又有芙蓉城。滴水厓。白猿洞。諸勝。今樓觀非昔。而峯巒峭拔。風景清幽。堪資游玩。卽仙蹤古蹟。固猶有可訪而得者。

偶住亭

偶住亭在江安縣東北。宋黃庭堅有夔道還過。與邑宰石諒同游此亭。書琴操。後致爲渡瀘亭。舊有范百祿平蠻碑。

古佛洞

古佛洞在江安縣東石巖間。厓上鐫面壁一大字。石磴數十級。循之而上。倚岩有層樓。可以眺遠。洞卽在上層。高五尺許。深二十餘尺。中有睡佛一軀。長二尺許。相傳清乾隆時厓崩而出者。

資州四岩

資州四岩並在資中縣。東岩在縣東三里。形若剖瓷。側立千尺。溪壑深杳。風景幽靜。西岩距城六里。石壁夾道。如城如峽。南岩卽重龍山。嶺翠盤曲。隱若龍轉。上有天池。大旱不竭。北岩距城半里。乳泉滴瀝。四時不竭。宋京蜀事補亡。東蜀江山瑰奇。資中爲最。資中勝遊十數。而四岩爲最。

佛岩山

佛岩山在仁壽縣東二十五里。一名佛龕山。有唐歐陽詢書摩崖碑。有三石像。背虛面岩。俗呼爲倒坐寺。

虞允文墓

虞允文墓在仁壽縣西玉山鄉塔山。允文字彬文。宋仁壽人。博學能文。登紹興進士。累遷禮部侍郎。金人入寇。允文督師江淮。有采石之捷。上嘉嘆曰。虞允文公忠出天性。朕之裴度也。孝宗時。累拜右僕射同中書門下平章事。封雍國公。允文知人敢薦。及爲相。籍人才爲三等。號村官錄。知名之士。莫不爲其收羅。裴熙元年。薨。贈太傅。諡忠肅。

雷番山

雷番山在雷波縣北。相傳山草爲毒。牲畜經過。必籠其口。行人亦必緘默。若或高聲。離冬月必有雷霆之應。隋史。萬歲征西南夷過此。嘗書雷番山三字。鐫於石壁。卽此。

五 嘉陵

盤龍山

盤龍山在閬中縣東。岡隴起伏。形勢雄壯。益州記。閬州盤龍山南有一石。長四十丈。高五尺。當中有戶及扇。若人之掩閉。古老以爲玉女房。輿地紀勝。蟠龍山以形得名。唐貞觀中。望氣者言西南千里外有王氣。令人入蜀。次閬中。果見山上氣色鬱葱。因鑿破山脈。唐咸亨中。嘗移縣治于山側。

文城山

文城山在閬中縣東三十里。峰巒聳列。林木葱蘢。一峯拔出。上有玄都壇。爲漢張道陵授符籙之所。相近有琅琊山。山有九井。泉流濺石。若振珮然。

將相堂

將相堂在閬中城南。乃宋陳堯叟兄弟讀書之所。岩上刻三相堂。淳熙中。太守吳昭夫重新之。扁爲將相堂。

房瑄墓

房瑄墓在閬中縣城外。瑄字次律。唐洛陽人。宰相房融之子。長才博學。風度修整。隱居陸渾山中。十年召爲盧氏令。玄宗幸蜀。瑄上謁行在。超拜吏部尙書。與韋見素同平章事。乾元元年以事貶邠州刺史。繼遷漢州刺史。後召拜刑部尙書。道卒。閬州僧舍葬此。杜甫有別房太尉墓詩曰：「他鄉復行役。駐馬別孤墳。近淚無乾土。低空有斷雲。對碁陪謝傅。把劍覓徐君。唯見林花落。鶯啼送客聞。」

北津樓

北津樓舊在南充縣北五里。道人張三丰詩云：「誰喚吾來蜀內游。北津樓勝岳陽樓。煙連沙岸漁歌起。水照江城歲月收。萬黑清波朝夕湧。千層白塔古今浮。壯懷無限登臨處。始識南游第一洲。」

畫卦石

畫卦石在南充縣東四十里。石有八卦痕。相傳爲李耳遺跡。

大蓬山

大蓬山在營山縣東北。其山高險。方圓四十里。上起十二峯。厓高數十丈。松木秀茂。下有仙人岩。又有朝隱洞。空闊可容數百人。山上舊又有蓬山館。江山勝概。爲一郡美觀。

孔雀洞

孔雀洞在營山縣東北一百二十里。洞門如圭竇。其中宏敞。左右有石牀。洞盡處有石孔雀。水出喙中。

佛龍洞

佛龍洞在儀隴縣西金城山。明萬曆間傾塌始見。內有生成石佛。上有佛龍洞三字。中可容四五十人。上下懸岩絕壁。各數十丈。景絕峻奇。

避塵山

避塵山在蒼溪縣東十里。峻嶺懸厓。舊有道院。李梁詩有「丹邱千仞上。元圃九霄開。脚底生煙霧。人從天上來」之句。

雲臺山

雲臺山在蒼溪縣東南三十五里。接閬中縣界。一名天柱山。又名鳳凰山。山峯峻峭。插天。有洞曰麻姑芙蓉。平仙。峻仙。池曰玉丹。玉魚。岩曰松根。蟠桃。又有丹竈。其東又有書岩。相傳葛稚川讀書之處。

思依山

思依山在南部縣西北一百四十里。相傳漢羅冲霄張道陵隱居於此。有峻仙洞。搗藥臺。浴丹井。煉丹爐。平仙穴。搗藥臼。卓劍穴諸遺蹟。

靈雲洞

靈雲洞在南部縣東北。外邃中廣。冬暖夏涼。入三丈許。踏之有聲如鐘。叩之亦然。

天台山

天台山在廣元縣西二里。峭厓蒼鬱。盤道縈紆。獨木危橋。委曲而上。至巔乃卽平陸。若天台然。因名。其北爲九隴山。環拱九十九峯。如劍戟之排列。鮮于侁益昌八景詩。九隴穿天外。卽此。亦謂之九峯山。山有漢王寨。相傳漢高祖嘗駐蹕於此。

龍門山

龍門山在廣元縣東北。亦名葱嶺山。有石穴高數十丈。其狀如門。俗號爲龍門。林壑幽深。頗足遊覽。

富水洞

富水洞在昭化縣西北二十里。然燭而入。踰木橋。路極窄。有石牀石笋之屬。又有大潭。深十丈。天旱取其水禱之。往往得雨。

藥臺

藥臺在昭化縣治西。有竇子明丹竈存焉。其臺與爐皆鐫石鑿成。工極精巧。非時人所能。

得漢山

得漢山在通江縣東一百二十里。厓壁崛起。削絕千仞。惟西南一徑可上。有一夫當關之勢。其上石壁如城。中平可容百人。可以耕藝。出泉冬夏不竭。相傳漢高祖據此。以通饗饋。有石刻云。宋淳祐中吳玠臨視形勢。命統制張實因險築壘。儲糧建邑。爲恢復舊疆之規。

十二峯

十二峯在南江縣東北。巉岩聳秀。大小十二峯。最爲奇觀。有客題詩曰。一插立翠峯。分十二。爲君喚作小巫山。一因又名小巫山。下有龍洞。相近又有蓬花峯。有石洞。曰蓮花洞。高空百餘丈。外臨深淵。內容千人。邑人嘗避兵於此。一名紅鯉洞。相傳溪中有紅鯉云。

巖園

巖園在劍閣縣城內。亭堂花木。頗饒幽趣。中有喜雨樓。高聳峙立。登臨其上。可以遠眺。萬家煙竈。全收眼底。

霄漢閣

霄漢閣在廣安縣治西。有唐顏真卿書霄漢閣三字石刻。

牛頭山

牛頭山在三台縣西南二里。一名華林山。山高一里。形似牛頭。四面孤絕。俯臨州郭。樓閣煙花。爲一方之勝概。山下有清涼洞。一名靈隱洞。相傳中通眉山中厓。

劉蛻瘞文處

三台縣南二里有兜率寺。建於隋開皇時。前瞰郡城。拱揖如畫。唐劉蛻晚歲嘗瘞其文於寺。曰文冢。自爲冢銘刻於石。文曰「文冢者。長沙劉蛻復愚爲

文不忍棄其草。聚而封之也。蛻愚而不銳於用。百工之伎。天不工蛻也。而獨文蛻焉。故飲食不忘於文。晦冥不忘於文。悲戚怨憤。疾病嬉遊。羣居行役。未嘗不以文爲懷也。適當無事。而天下將以文爲號。文明代。生植明晦。皆效文用。故日月星辰。文乎旗常。魚蟲鳥獸。文乎彝器。徐方之土。文於侯社。夏翟之羽。文於旌旄。登龍之章。升至於藻。百工婦人。雕礪染練。以供宗廟祭祀之用。豈獨蛻也。生知效用。不及時文哉。然而意常獲助於天。而不獲助於人。故雖窮無憾也。當勤意之時。不敢噫。不敢唾。不敢跛倚。嗜欲躁競。忘之於心。其祇祇畏畏。如臨上帝。故有粲如星光。如貝氣。如蛟宮之水。又有黯如屯雲。如久陰。如枯腐熬燥之色。則有如春陽。如華川。透透迤迤。則有如海運。如震怒。動蕩怪異。夫士爲文。不得十如意。少如意。則豈非天助乎。常欲使天下聞之。而必行。觀之。而必蹈。散之。茫洋以爲道。演之。浸淫以及物。然後爲農文之。使風雨以時。兵文之。使戎寇以順。交於野。文於市。使得其所。幽隱之士。以出口者。

使之言。材者使之用。然而自振者無力。終知者甚稀。豈非不獲於人助乎。嗚呼。十五年矣。實得二千一百八十紙。有塗者。乙者。有注楷者。有覆背者。有硃墨圍者。於是以周易筮之。遇復之同人。筮者曰。鳴於地中。毀毀隆隆。七日而復。復來而天下昭融乎。他日更召龜而合之。將聽襲吉。卜於火。如秦。兆惟曰。不告。卜於水。不成乎。河洛。兆則亦惟曰。不吉。卜於木而悶悶。土協吉。纍纍爲冢。則汲之兆乎。峭峭爲壁。則魯之兆乎。且其占曰。土之文爲山河。爲華英。將不崩不竭。爲滋味而傳乎。結爲邱陵。爲其設險乎。融爲川瀆。率其朝宗乎。華爲百穀。以潔祭祀之粢盛乎。不然。使其速腐爲墟壤。生芻藁以食牛羊乎。化塗泥爲陶甄。以作器乎。將塊爲五色。而分封茅社乎。流於樂。爲土鼓。爲蕢桴。以洩其和聲乎。夷爲都邑。以興宮廟乎。坎爲洿池。以澤生植乎。祀爲壇竈乎。竅爲井墓乎。吾皆不得而知也。當世旣不得爲吾用。唯速化爲百工之用。慎無朽爲芝菌。以怪人佳媚。慎無堅爲金鐵。以行貨起爭。慎無滲爲醴泉。以味

乎讒口。慎無擣爲城社。以狐鼠憑妖。慎無聳爲良材。以雕斷傷性。慎無萌爲蘭茝。以佩服見褻。嗚呼。介而爲石。使之能言。舒而爲螾。使之飲泉。旣而他年。遊魂之未返者。亦命巫師而弔三招之。號曰。在几閣而來歸兮。掩爲塵垢。在耳目而來歸兮。奄視汝醜。在口吻而來歸兮。譽不汝久。噫。筆絕之年。而麟見崇。文其無崇乎。哈非珠玉。斂無裙襦。後世詩禮之儒。無侵吾之幽墟。其冢在莽倉之野。大塊之邱。時有唐大中丁卯而戊辰之季秋。銘曰。文乎文乎。有鬼神乎。風水惟貞。將利其子孫乎。一按蛻字復愚。唐荊州人。咸通進士。爲左拾遺。後以與令狐滈同官。奏其無家法。以布衣竊卿相權。坐貶山陽令。蛻博學善屬文。詭異有奇氣。性尤耿介。初荊州每歲解舉人。多不第。號曰天荒。及蛻以荆解及第。號爲破天荒。時鎮守以破天荒錢七十萬資蛻。蛻謝辭。略曰。三十年來。自是人廢。一千里外。豈曰天荒。時論欽嘆。

天柱山

天柱山在中江縣西南。一名覆船山。又名泊山。相傳堯遭洪水。維舟泊此。覆於樹下。因名。又名天霸山。山勢峻險。冠絕羣峯。有風穴。人往視。輒風起。清王士禛嘗游其上。有詩云。一朝出元武門。雲垂雨忽洩。暴雨也。登登天柱山。千盤墮瀆洞。崢嶸逾巴閬。槎牙過秦鳳。陟嶺如累棋。下谷如入甕。心俯尻益高。足縮目先送。敢嗟鳥獸羣。稍喜徒旅衆。我有大羽箭。麗龜輒命中。於菟昂其首。飲羽乃不動。道旁松合抱。巨可任樑棟。惜哉野蔓纏。不蒙匠石用。絕頂見岷山。青城亦伯仲。一氣連諸蕃。三州實西控。太平幸無事。左髻時入貢。念彼松姚戍。坐甲苦飢凍。俯臨陸海雄。仰視天宇空。長嘯千仞岡。出險忽如夢。又絕頂望見岷山詩云。一鞍馬衆峯頭。蒼茫萬里收。岷山橫塞出。灌口接天流。要害三城戍。邊防八月秋。大荒飛鳥外。眼底盡姚州。

韭菜巖

韭菜巖在蓬溪縣東南一百里。盤旋峙立。高數百尺。巖半一小臺。人跡不能

到。中。產。韭。四。時。秀。嫩。相。傳。神。仙。所。種。



上海图书馆藏书



A541 212 0018 9754B

